

IHASOMANI DO HITTA TONGTONG

“Ajari hanima ma sidea mangkorjahon sagala na dob Hutitahkon bannima, “Tonggor ma, sai na hasomanan-Ku do hanima ganup ari, ronsi roh ujungni dunia on.”

MATEUS 28:20

Marosuh mangan nangkani, tapi mabiar hona gotahni. Hata on mararti, marosuh bani na mantin ni tumang tapi marayoh bani horja. Parentah ni Jesus Kristus Tuhanta in do hata na nibasanta nongkan, hu bani ganup susian-Ni das hubani panorang on. Gabe palita hasintongan ni Naibata do hita, ituntut Tuhanta do ase saksihon hita ibagas goluh hagolapon ni dunia on, ase paubah uhur janah maluah sidea homa. Ai ma sura sura ni Tuhan in banta na padiparhon hita das hu bani tahun on. Iparentahkon ase gabe susian na rajin hita bani horja haluahon ni Tuhanta hu bani ganup hasomanta na legan.

Gabe susian ni Tuhan Jesus ai ma ase manggoluh hita lang hubani dirinta tumang, na egois janah na puas bani haluahon ni dirini sandiri, tapi sihol ma dihut homa mambagi-bagihon haluahon na humbani Tuhan in hu bani halak na legan. Susian na malas-malas janah na lang martanggung jawab do sagala halak na marosuh bani na mantin ni tumang, na maroyuh bani halojaan mangambilankon ambilan haluahon ai. Hotop hita lang ra mamakei dana pakon daya na binereni Tuhan banta janah lang ra mambere uhurta laho mambaritahon kuasa ampa hagogohon ni Jesus Kristus Tuhan in. Borat do horja haluahon on. Maningon maruntol hita tarlobih mandompakkon dirinta mangalo uhur na mangkaporluhon diri sandiri ampa rayoh bani horja haluahon. Maningon maruntol hita homa mandompakkon bagei-bagei na masa ge na sihol masa i lambungta bei. Boi do haru tumang uhurta janah mabiar botul halani mardingat bani masa lampauta sonai ge tarlobih manranapi aha na laho masa na sama sekali lang dong pambotohta pasal ai.

Tapi age sonai, boi do hita mandalankon horja haluahon ai anggo domma manggoluh i bagas dirinta hata na manghatahon, sipanganon do ai bangku manghorjahon harusuh ni Naibata janah asal ma ra hita, ai domma ondos hu bani Kristus Tuhanta in sagala kuasa na i Nagori Atas pakon i tanoh on, mambahen na ihatahon hubanta: Tonggor ma sai hasomanan-Ku do hanima. Sonang do pangahap ni duta besar horjani na borat in i nagori ni halak halani dong do kuasa bani humbani Pamarentahni na mangirimsi hujai. Sonai ge ganupan hita na dob susian ni Kristus in. Doskon duta besar ni Tuhan in do hita i dunia on. Tuhan in sandiri do na mangkasomani hita ganup ari.

Pangkasomanion ni Naibata bani goluhta sedo songon panggambarhonni deba halak songon langit, ija nahei ni langit ai taridah daoh i lobei ampa i pudi tapi anggo langit ai sandiri daoh tumang humbani jolma in. Gambaran na lepak botul do ai, halani Tuhanta Jesus Kristus, Ia do nantuari, Ia do sadari on janah Ia do ronsi sadokah ni dokahni. Sonai ma homa Tuhan in, mangkasomani hita ganup ari. Anggo sonai porluhon hita horja haluahon in dompak hasomanta na legan. Nani horja ma tongtong Tuhan in mangkasomani hita ganup ari, ronsi roh ujungni dunia on.

***Tonggo:** Ham Tuhan Naibata Bapa nami. Baen suruhan-Mu ma hanami, ai seng soya Hata-Mu. Janah Ham homa manogu halak na roh hu Bamu. Holong atei-Mu sai togu janah ondos haganup hu Bamu. Amen.*

**HALELUYA NO. 8:1-2**

1. O Jesus hasomani,  
Hanami haganup.  
Pasada uurnami  
Ase torang ganup.
2. Seng boi dalannami,  
Salangkah na torsa.  
Dob Ham hasomannami,  
Torang age hujai.

## PARMAHAN NA MADEAR 2 JANUARI

### ARI NI TUHAN DO GANUP ARI IN

**“Ari on do na jinadihon ni Jahowa, marolob-olob anjaha marmalas ni uhur ma hita halani ai.”**

**Psalmen 118:24**

Buei do halak na maniti ari. Ai nini uhur ni sidea lang ganupan ari in madear. Halani ai manonggor ari ma sidea atap na ija do ari na jenges laho mamongkot rumah, laho mamungkah sada horja na baru, laho mardalan hu na daoh, laho kawin pakon na legan. Nini uurni na deba homa, lang tarsibar sonaha ari patar halani ai isalahgunahon sidea ma ari na nidalanan ni ai laho mambuat untung sahabat-sahabatni domu hu bani kuasa ampa jabatan pakon horja na dong bani age pe namin domma manlanggar hata ampa harosuh ni Naibata. Ganupan on ai ma halani biar ni uhur ni sidea bani goluhni ari patar.

Ari na ija do ari na jinadihon ni Jahowa? Ra sonai sungkun-sungkunta dob manangar ayat nongkan. Lang ihatahon ari ni sada tanggal ibagas sada bulan ampa tahun pe. Ari on ai ma sagala bulan ampa tahun. Ai ma ari na dob salpu, ari sonari ampa ari na laho roh. Ai ma ari on, ari na jinadihon ni Jahowa, ari parolob-olobon anjaha ari malas ni uhur.

Ihatahon Tuhanta: Ahu do Alpa pakon Omega, Bonani pakon Ujungni, na dong sonari, na dob hinan pakon na laho roh. Lang adong ge sadetik pe hape humbani panorang in na lang ibagas gomgomon ni Naibata. Ia do hape na manggolom ari on. I toruh ni kuasa-Ni do haganup panorang. Buei do na masa bani ari in. Na masa halani ulah ni jolma hu bani hasoman ni sandiri na gati lang be songon hasoman samah sidea tapi marsisubilan, marsimusuhan. Hotop masa na so adat, na so uhur, lang marsihaholongan, tapi domma marsisarihon dirini bei. Buei homa na masa ibagas ari in bahaya, banjir, gempa bumi, logou ni ari maningting pakon na legan. Mangidah na masa in nambahen gati lambin roh biar ni jolma in, halani ai sai marusaha ma sidea marsipaluah dirini bei na so pala mamingkirhon halak na legan. Tapi ia sonaha pe namasa ibagas ari in tarbahen do marolob-olob janah marmalas ni uhur haganupan na ibahen Naibata. Ai seng dong humbani ari in gabe hamagouan bani sidea ibahen Naibata sobali na gabe ari pasu-pasu janah ari haluahon ibagas Jesus Kristus Tuhanta in.

Ia aha pe na masa ibagas ari in banta, jolom anjaha haporsayai ma Jesus Kristus simada ari in, ai bani ari in do tongtong Ia mangkasomani janah mangkaholongi hita, humbani ari bonani tahun on ronsi bani ari-arini goluhna hunjon hujan. Halani ai tongtong ma papansing hita ari in marhitei pargoluhanta, mangkorjahon hata ampa harosuh ni Naibata. Ase gabe ari haluahon, sai malas ni uhur anjaha ari parolob-olobon ma banta ari on tongtong.

***Tonggo:*** *Ham Tuhan Naibata Bapa nami. Ham do simada kuasa ampa hagogohan ampa na marsimada bani ari-ari goluh nami. Halani ai holong ma atei-Mu sai paruhuri janah parmalo Ham ma hanami mamakei ari-ari nami ase saud gabe ari parolob-olobon janah ari malas ni uhur ari on bannami. Amen.*

#### HALELUYA NO. 52:2-3

- |  |  |
|--|--|
| 2. Pingkiranku, pa horjangku,<br>Sai pasangap Ham ma in.<br>Puho barang modom ahu,<br>Ham tongtong i lambungkin.<br>Laho luar masuk pe,<br>Ham hasomankin use. | 3. Tahun parholong ateian,<br>Ma hubanguku tahun on.<br>Ham patotap hasasapan,<br>Ni dousanguku bangku on.<br>Pitah Ham, o Jesuskin,<br>Boi manasap dousangukin. |
|--|--|

MARTENGER NI UHUR MA BANI JESUS TUHANTA

**“Tapi mintor iparsahapkon Jesus ma sidea, nini ma: Tenger ma uhurnima, Ahu do on! Ulang mabiar.”**

**Mateus 14:27**

Buei tumang do sihabiaran ni jolma bani goluhni. Dob madabuh sidea hubagas dousa hira bangkou ni sidea mando use mabiar. Ibagas na mardalan janah mangkawah hu lobei, somal do jolma in mardingat janah marlajar humbani masa lalu ni.

Ipardalanan do goluhta nuan, songon susian ai marparau manuju dompak lobei mandipari tao atap lautan na bagas janah margalumbang na marhasak, logou na marhalisungsung ampa udan na marambolas. Bani goluhta na marparau i lautan luas i dunia on, Jesus mangkatahon hubanta: Tenger ma uhurnima, Ahu do on! Holong tumang do uhur ni Tuhan in banta, ai humbani na binohtohta age humbani na lang nisadaranta tongtong do Jesus in masuk janah marianan rap pakon hita ibagas parau ni goluhta i dunia on, ai ma songon kehadiran ni Jesus hu bani susian na marparau ai.

Hunjon taridah gabe porlu maningon botohonta, ia na binotohta pasal dirinta ampa na sihol masa banta otik tumang ope ai, marimbangkon ni Jesus Tuhanta na mambotoh ganup pasal hita, age na masa bani goluhta. Ia sonaha pe panjagaionta bani dirinta, janah ia sonaha pe pansarihonta bani goluhta, songon na binahen ni buei halak marhitei na pagugun arta, na mangajamkon kuasa atap hagogohan pe, usaha sisoya-soya do ai haganupan anggo lang Jesus Tuhan banta na manjaga anjaha na manramothon hita.

Naibata Tuhanta, Ia do Sipanompa, Sipangatur, Sipagoluh janah pitah Ia do Naibata Tuhanta Sisada-sada in na i atas ni haganupan ampa i babou ni sagala panorang. Halani ai do ase ihatahon Tuhan Jesus hubanta: Tenger ma uhurnima, Ahu do on! Ulang mabiar!

Tuhan Jesus sandiri do na gabe jaminan ni goluhta ase boi hita maluah humbani biar ai. Pakei hita Jesus Kristus bani goluhta, ai marhasoman Jesus lang adong be habiaranta halani anggo Naibata hasomanta ise nari imbangta?

**Tonggo:** *Ham Jesus Tuhan nami na markuasa, na marhagogohon janah na manrajai i atas ni haganup. Gok biar do goluh nami halani bagei ni na masa na manginggoti hanami i dunia on. Holong ma atei-Mu benannami, bahen Ham ma hanami tongtong martenger ni uhur Bamu, ase ulang mabiar be hanami, hasomani Ham ma hanami ibagas parau ni goluh nami ari-ari ase sonang janah marulih hanami bani haluahon ampa hagogohan sisadokah ni dokahni. Amen.*

**HALELUYA NO. 145:2-3**

2. Sai ulang be da mabiar ganup,  
Boiskon ma da gogohmu ganup!  
Age roh si bolis lao mandorap ho,  
Sai tatap ma Jesus  
Nalompou gogoh.
3. Horjahan bujur Hata-Ni ganup,  
Sai monang jojur baenon-Ni ganup.  
Ai Ia do Raja na monang tongtong,  
Patitir pe bala  
Manginsurut tong.

JESUS DO RUTI SIPANGANON ASE MANGGOLUH HITA

“Ahu do ruti hagoluhan in.”

JOHANNES 6:48

Barang ise marsimada bani ruti, ai do na markuasa bani jolma. Barang ise marsimada bani ruti, ia do na markuasa bani panorang na laho roh. Ise na marsimada bani ruti, hatani ai ma sibalosan. Somal do ipraktakkan buei halak pingkiran na i atas in bani goluhni. Halani ai sai marusaha janah marlumba do jolma hu jolma ampa bangsa hu bangsa sonaha ase ia atap sidea marsimada bani ruti ai.

Tongon do, ruti ai do sipanganon, sada bagian na maningon dong janah manontuhon bani hagoluhan ari-ari ni goluhta. Hansi maningon do botohon homa barang ise na marpingkir sipanganan tumang hagoluhon ni jolma dos pakon pinahan mando use goluh ni jolma in na so pala porlu mambotoh hunja sipanganan ai janah na so parduli homa bani pinahan na legan. Porini boi, sahali nari, porini boi iatur janah maratur dunia on pitah marhalahon ni sipanganon na gok na so pala mar-Tuhan bani Naibata Bapa, Anak pakon Tonduy Napansing, gabe dunia gabus, dunia partinggilan, dunia porang pakon dunia dousa na hu hamateian ai mando dunia on. Halani tangkas ipaingat Jesus hita, sedo sipanganon hansa hagoluhanni jolma, tapi haganup Hata ni Naibata, na luar humbani pamangan-Ni. Jesus Tuhanta in marhatongonkon na maningon manggoluh homa jolma in humbani ruti sipanganon, ai Ia sandiri mangojur hita martonggo, mangindo hagoluhan ari-ari humbani Tuhanta.

Tapi ningon dingatonta, ruti sipanganon na lang humbani Naibata, sedo na pabosurhon janah lang na pagoluhkon hita. Halani ai do use ase ihatahon Jesus hubanta “Ahu do ruti hagoluhan in”. Ia do harohan ampa bona ni sagala pasu-pasu pardagingon pakon tonduyta na pala matei tarsilang Ia i Dolog Golgata manggalangkon daging pakon daroh-Ni manghopkop hita ase manggoluh hita. Haluahon na humbani Kristus Jesus ai ma haluahon na gok, haluahon sonari ampa sadokah ni dokahni banta in ma marhitei hita na sirsir manggoluh ibagas Kristus Tuhanta, songon na nihatahonon-Ni: Sipanganon do ai Bangku, mangkorjahon rosuh ni na marsuruh Ahu ampa mandobkon lahoan-Ni (Johannes 4:34).

***Tonggo:** Tarima kasih pakon puji-pujian sombah nami bamu Jesus Tuhan Ruti Hagoluhan nami. Ham do simada hanami, manggoluh hum Bamu do hanami, halani ai bahen Ham ma hanami mangkorjahon horja ampa mandobkon lahoan-Mu, ai in do sipanganon nami. Amen.*

**HALELUYA NO. 100:1-2**

1. Hujon ma ho, ale tonduyhu,  
Na harohan loheian tong,  
Manjalo layakni Tuhanmu,  
Pinasirsir-Ni in tongtong.  
Ibere Jesus do daging-Ni  
Marhitei-hitei ruti on  
Ibere do pakon daroh-Ni  
Marhitei hitei anggur on
2. Age tongtong pe ari-ari  
Daroh-Ni mangurasi au,  
Anjaha seng marnamangadi,  
Manogu hu lambung-Ni au;  
Sihol au mangan parpadanan  
Ni Jesus Kristus, Tuhankin.  
Na padameihon partinggilan,  
Na pasonangkon uhurhin.

KRISTUS DO DAMEI BAHEN HASONANGANTA

“Tuhan sipardamei in na mambere damei bani nasiam tongtong marhitei haganup pambahenan-Ni! Tuhan in ma mangkasomani nasiam.”

2 Tesselonika 3:16

Bagei do balosi ni halak anggo isungkun sidea pasal aha do arta na tang siharganan. Tontu dong na mangkatahon arta, jabatan, habotohan, hajorgitan pakon na legan. Tapi anggo na manat ipingkiri hita balosni hape, ai ma: Damei ni Naibata. Damei do iberehon Tuhanta, sanggah lungunan jolma in damei homa do ihatahon Tuhanta bani sidea sanggah loheian, sonai homa do ihatahon Tuhanta bani sidea, sanggah gok biar ampa holsoh. Damei homa do iberehon laho manorapi tonduy ni jolma ampa mangatasi ganup hauhuron laho manramothon uhur ampa pingkiran ni sidea.

Bagei do dalan-dalan ampa usaha ibahen jolma in sonaha ase mardamei; sonaha ase mardear janah sonang, gok malas ni uhur sidea ibagas rumah tangga, ibagas huta, negara hu negara i dunia on. Dear tumang do ai. Tapi humbani sagala cara ampa usaha na binahenta ai maningon dingaton do usaha na soya-soya do haganupan in anggo lang Naibata ipaturut hita na marhorja i tongah-tongahta, ai Ia do damei janah harohanni damei ai. Tongtong do Naibata mambere damei-Ni banta lang pitah sanggah sonang marmalas ni uhur tapi age sanggah pusok ni uhur ampa ibagas hasunsahan hita, ge ija atap sanggah mangaha pe hita.

Sahali hona sungkun do sahalak perkapal selam nini: Ai lang mabiar tumang ma nasiam ibagas kapal selam ai, ai sonai ma dorasni gilumbang marhasak, udan pe marambolan janah logou pe marhalisungsung homa? Sonon do balos ni parkapal selam ai: Lang pala sai iahapkon hanami ai, ai markapal selam hanami daoh do ibagas laut ai hanami.

Sonai do homa age hita pe. Lang hu hasedaon janah hu hamagouan hita ia sonaha pe gilumbang na masa bani goluhta on, lang terpengaruh hita halani na masa ai asal ma daoh hita marianan ibagas damei sejahtera ni Naibata. Domma i tongah tongahta damei sejahtera ni Tuhanta ibagas Jesus Kristus, Anak ni in ma ipataridah bani pambahenan-Ni na pala matei tarsilang Ia ase marsimada hita bani damei ai. Ia ma tangihon hita, halani ai balosi hita janah porsaya hita hu bani bagah-bagah-Ni, ase marulih hita bani damei-Ni age pe hita i tongah tongahni bagei na masa bani goluhta on.

***Tonggo:** Ham Tuhan Naibata Sipardamei. Holong ma uhur-Mu sai damei-Mu ma tongtong na manrajai janah manramotkon uhur; pingkiran nami ase tongtong hanami ibagas na sonang janah lang terpengaruh ia sonaha pe bagei-bagei ni na masa i tongah-tongahnami. Amen.*

**HALELUYA NO. 19:1-2**

- |  |   |
|--|---|
| 1. Damei do ni-Mu bereon,<br>Jesus, bani bangsa-Mu.<br>Tonduy-Mu do pasaudkon,<br>Hata bai jabolon-Mu.<br>Na doyuk janah masombuh,<br>Au seng patut rongkon Ham<br>Tonduy Napansing ma suruh<br>'Se gogoh manombah Ham | 2. Ale Tonduy Sipardamei<br>Sai masuki hanai on.<br>Sai pasada uhur nami,<br>'Se marbuah ganup on.<br>Sai tangi ma pinggolnami<br>Lao manangar ojur-Mu;<br>Ase tambah ringgasnami,<br>Pararatkon Hata-Mu. |
|--|---|

EPIPHANIAS – PARTALAR

“Ahu do Panondang na roh hu dunia on, ase ulang marianan ibagas na golap sagala na porsaya Bangku.”

Johannes 12:46

Ia ari onom Januari, ai ma pesta Epiphantias i tongah-tongah ni kuria Kristen. Humbani hata Gorik do roh istilah Epiphantias on, na mararti Partalar-Hatatar. Mangihutkon Gereja Ortodoks, ipestahon sidea do pesta Epiphantias on songon pesta partubuh ni Tuhan Jesus. Mangihutkon sidea apala bani panorang ai ma talar bintang ai bani Majus i Betlehem.

Marhitei on ma ipatar Naibata hubanta: Tuhan Jesus do Tuhan ni sagala bangsa (Mateus 2). Tuhan ni age alam semesta (Johannes 2:1-11). Ia ma homa Anak ni Tuhan ni sagala tuan (Mateus 3:13-17).

Ia ambilan sadari on patalarhon banta Jesus do hape Panondang ni dunia on. Ai hambani hadirion-Ni hinan pe domma lihar Ia, ase seng dong atap aha pe na boi sanggup mangolat haliharon-Ni ai. Atap ija Jesus ijai ma Panondang haliharon in, seng dong na golap na raphon-Si. Sebalikni use atap ija lang hadir Jesus, na golap do ijai. Age lihar mata ni ari, pondang age listrik marwarni-warni anggo seng ijai Jesus, golap do hauhuron ni na marianan ijai.

Ia panondang on sedo paliharhon pardagingon hansa tapi tarutama haliharon ni partonduyon do. Halani anggo golap ma partonduyon sonai age paruhuron ni sada halak, golap ma haganup hadirionni. Sebalikni do homa porini pe lang boi marpangidah sada halak ibagas pardagingon, anggo lihar do partonduyon pakon paruhuronni, torang do pangahapni.

Marhitei aha ma boi torang panonggor ni hauhuron pakon partonduyonta? Ai ma anggo ra hita manjalo janah mangkaporsayai Jesus. Na manjalo Jesus lang ra be ia papitungon ni na adong i dunia on, age sangap, habayakon, kuasa, age hamiskinon pakon hadoyukon pe. Tontu anggo na dear do langkahta lang sai marosuh hita mardalan bani na golap. Seng dong age aha, atap ise pe na boi sanggup paliharhon partonduyon pakon hauhuronta sobali Jesus.

Ase mardalan ma hita sanggah banta ope Panondang in, ai dong do panorang seng tarbahren hita be mandompakkon-Si.

**Tonggo:** *Domma ipatar Ham bannami sondang-Mu in Ham Naibata, marhitei kehadiran ni Jesus Anak-Mu in. Urupi Ham ma hanami ase tong hanami mardalan bani haliharon in. Amen.*

HALELUYA NO. 17:2-3

- |   |  |
|---|--|
| 2. Golap uhur nami on,<br>nin homa pambotohnami.<br>Anggo seng Tonduy-Mu in,<br>paliharhon uhurnami.<br>Ningon Ham do patureihon,<br>dalan sidogeionnami. | 3. Sondang hambani Naibata,<br>haliharon roh hun datas.<br>Baen torsa, sondangi ma,<br>uhurnami, ase megah.<br>Lao manjalo hagoluhan,<br>pinasirsir-Mu, Tuhan. |
|---|--|

## PARMAHAN NA MADEAR 7 JANUARI

### JAHOWA DO HATENGERAN NA TOPAT

**“Halak na martenger ni uhur bani Jahowa, songon Dolog Sion do, lang dugur, ronsi sadokah ni dokahni do totap.”**

#### Psalmen 125:1

Sadari on pe tong do ipatalar Naibata hubanta hagogohon-Ni, hatotapon-Ni. Ipausih do barang ise martenger ni uhur Bani, songon sada dolog na so tardugur, anjaha na so tarosor. Anggo ididah hita sada dolog mintor tarbayang do bani uhurta habanggalonni. Sasintongni lobih hunjai ope hatotapan ni Naibata. Ai porini dugur pe sagala dolog, mosor sagala raboyon anggo Naibata pakon idop ni uhur-Ni seng ra mosor.

Ia jolma idunia on hotop do mangkawah bani dolog, mangunsandei bani gajah, artini ai tong martenger ni uhur anjaha marhabiaran bani halak siparkuasa pakon na gogoh. Tapi anggo laho hita mangidah sejarah dunia on: Raja-raja siparkuasa, umpamani: Harajon Babel, Rom pakon Herodes, haganupan in salpu do, magou do kuasani.

Tapi ambilanta sadari on patugahkon banta, ise halak martenger ni uhur bani Naibata totap do anjaha seng tardugur. Halani ai ulang be salah hita mamilih na gabe hatengaranta sadokah hita i dunia on, ai ma bani Naibata Jahowa tumang hansa. Buei do mansura-surahon ase abadi ia, age kuasani tapi tinggal sura-sura do hansa in anggo na idah bani kenyataan seng dong. Kuasa, hagogohon, harajaon, na i dunia on marsintig do, mubah-ubah do ganup, seng dong na totap.

Legan do anggo Naibata pakon na martenger ni uhur Bani, lang ra marujung, lang ra salpu, halani Ia do sitompa sagala na adong in, Ia do sumber ni haganup, aha pe lang na so tarbahen-Si. Halak na martenger ni uhur Bani, lang mabiar hurangan, ai sirsir do na mangurupisi bani panorang na porlu. Tongon lang sai topat dapat hita hum-Bani songon na ipindo hita Bani, tapi aha na patut na boi patorsahon hita, ai do iberehon banta.

Ase ulang kecewa hita bani goluh on, sai martenger ni uhur bani Jahowa ma hita. Hotop do itundalhon hita Naibata sumber hagoluhanta, na songon bah tubuh na mardear, laho hita mangindahi hatengeran ni uhur na legan. Dob ai tading halojaon tumang do hansa dapat hita ijai. Ambilan sadari on pasingatkon hita, ase ulang martenger ni uhur bani jolma hita, atap bani aha pe, sobali bani Naibata.

**Tonggo:** *Ham Tuhan Naibata hatengeran na tarsulur. Domma ipatalar Ham bannami marhitei Jesus Kristus, Ham tumang do hansa hatengeran na totap, hape hotop do hanami sai laho tong mangindahi hatengeran na legan gabe loja anjaha sunsah hanami. Urupi Ham ma hanami Tuhan ase tongtong hanami martenger ni uhur Bamu tumang. Amen.*

#### HALELUYA NO. 207:1+3

1. Bere Ham ma hatorangan,  
hapentaran mangarusi hata-Mu.  
Ampa mata na mangidah  
pakon uhur na mambotoh dalam-Mu.  
Ase tongtong mandompakon bohi-  
Mu hanai mardalan.  
Ase igomgomi Tonduy-Mu hanami.
3. Sai martuah ganup hita,  
na mambahen Jesus arihanni in.  
Ambit sai tongtong ra hita,  
martenger ni uhur bai Tuhanta in.  
Ham, o Jesus, sai patoguh hanai na i  
parporangan.  
Ase jumpah bai ujungni hamonangan

IPAPINDAH

“Ia do, na paluahkon hita humbani kuasa ni hagolapan, anjaha ipapindah do hita hubagas Harajaon ni Anak, na hinaholongan ni uhur-Ni in.”

Kolosse 1:13

Anggo sihol tukar atap pindah negara sada halak, umpamani humbani warga negara Indonesia gabe warga negara Inggris atap Belanda ningon ipenuhi do syarat na itontuhon negara ai. Sipata hansi pe domma ipenuhi persyaratan ai, lang mintor boi podas dapotsi hak warga negara ai, maningon paimaonni do lobei haputusan ni wewenang pasal ai.

Humbani pihak hajolmaon pakon partubuhta halani na dob madabuh hita bani dousa, manggoluh ibagas hagolapon da jolma in haganup. Tapi tarima kasih ma bani Tuhan Naibata na dob marsuruh banta Jesus Sipaluah in. In ma paluahkon hita humbani harajaon hagolapon in. Itobus do hita marhitei daroh-Ni na durus i Golgata laho manghopkop hita, ase ulang ikuasai, igomgomi harajaon hagolapan in hita. Seng dong pala ituntut humbanta persyaratan na borat, pulin ra hita manjalo haluahon na binahen-Ni ai. Anggo mangajamkon gogoh pakon usahanta do lang tarbahen hita maluah humbani kuasa hagolapan in. Gari na dob ipalihar Tuhan Jesus pe hita, tong do igoda-goda sibolis in ase mulak hita use hubani.

Sibere-bereni Naibata do banta haluahon na humbani Tuhan Jesus. Holong uhur tumang do na paluahkon pakon na papindahkon hita bani harajaon-Ni ai. Ase legan ni penyerahan diri, holong do hansa persyaratan bani Harajaonni Jesus on. Ase manggoluh hita ibagas holong ni uhur pakon marpangarapan pakon na tong ope hita ibagas harajaon haliharon ai. Anggo lang dong be pangarapan pakon holong ni uhur ibagas dirinta lang be hita ibagas harajaon haliharon ai.

Hatani Naibata banta sadari on, patalarhon use sonaha holong ni uhur ni Naibata banta jolma pardousa on, ase ulang hita lalap ikuasai harajaon ni sibolis.

**Tonggo:** *Tarima kasih ma Tuhan Naibata na dob papindahkon hanami jolma pardousa on, humbani harajaon hagolapon hubani harajaon haliharon-Mu. Patotap Ham ma uhur nami manjalohon in, ase ulang magou hanami, marhitei Jesus ipindohon hanami tonggo nami on. Amen.*

**HALELUYA NO. 54:3-4**

3. Salpu do nuan bornginni,  
binsar do panondang in;  
Domma roh haliharon-Ni  
bani ganup jolma in.  
Sai maluah nasiam  
humbani golap nasiam.
4. Jesus, sondang ni tonduyhu,  
na palihar haganup.  
Sai paubah Ham uhurhu  
humbai dousa haganup.  
Tarik ampa uhurhon  
bai na liar in tongtong.



PASANGAP GORAN NI NAIBATA

“Anggo Ia, patut do lambin bangga, tapi ahu lambin etek ma.”

Johannes 3:30

Ia ayat on sada pangakuan ni si Johannes Pandidi do on, pasal Jesus. Ia do na sinaksihonni na sihol roh na hunpudini, anjaha banggalan do Ia ase si Johannes, janah lambin marbanggal do Ia. Ipausih do Jesus songon sada tunangan na mambahen malas uhur ni ganup na mangkasomani-Si. Sadokah rup pangkasomani ai pakon parunjuk in seng dong hurangni, malas ni uhur do hansa.

Ase torang ma banta marhitei ambilan on, tergantung bani Jesus hape malasni uhur atap pe pusok ni uhurta ai. Anggo Jesus do tong manonjol bani sagala horja, rencananta, atap aha pe na ibahen hita tontu lang dong banta pandoleian.

Dob isungkun si Johannes ise do Jesus marhitei na mansuruh susianni roh bani Jesus, dapot ma balos na torang anjaha lang adong bani pandoleian age pe marsitaronon Ia.

Sihol ma sonai age hita sanggah na mambasa ayat sadarion, anggo adong na hurang torang banta pasal horja pakon situasi ni goluh on pakon goluh ni keluarganta pe, roh ma hita marsungkun bani Jesus marhitei tonggo ase ipatorang ai banta. Ulang lupa hita homa, sagala horjanta, sihol ma ai gabe hasaksian, pasal goran ni Jesus, hansi pe ipakei Naibata hita gabe parugas ni i tonggah-tonggah ni kuria ni, dear mardalan kuria ai sonai age pembangunan, ulang ma ginjang uhurta pasal ai. Tapi puji hita ma Naibata halani ra Ia mamakei hita jolma na so margagan on gabe parugas-Ni.

Sonai do homa bani haganup horjanta ari-ari bani goluh on, porini pe boi hita marhasil, gabe marpangkat anjaha bayak hita, ulang ma lupa hita laho manonjolhon goran ni Naibata marhitei pasu pasu-Ni in. Ulang gabe dirinta itonjolhon hita gabe ginjang uhurta gabe lupa hita martarimakasih Bani.

Ia halak na so pasangaphon Naibata bani ganup goluh pakon keberhasilanni bani pasu-pasu na jinaloni seng mandapot malas ni uhur na sintong ai. Ase barang ise na marmalas ni uhur ibagas Tuhan in, artini ai pasangap Tuhan ma.

**Tonggo:** *Goran-Mu ma tong Tuhan sipasangapon bani haganup horja pakon langkah nami. Ase lambin marsangap Ham i tonggah tonggah nami. Amen.*

**HALELUYA NO. 219:1+3**

1. Marmegah megah hita on,  
mamuji Naibata.  
Ai idop ni uhur-Ni do,  
na masuk bai uhurta in.  
Mambahen nuan mardomu in,  
ijon sadarion, ijon sadarion.
3. Sai dingat hita on tongtong,  
mambahen sangap tongtong.  
Barita ni Tuhanta in,  
marhitei parlahouta in.  
I lobei ni hasoman in,  
i atas tanoh on, i atas tanoh on.

MARBANGGAL IBAGAS JESUS

“Ai ibagas Ia do itontuhon Naibata marianan hagogokni in.”

Kolosse 1:19

Marhitei ambilan sadarion sihol do homa pataloron ni Jesus, Naibata hubanta marhiteion diri-Ni sandiri. Marhitei Jesus sihol taridah hagogok atap pe kesempurnaan ni panompaon ni Naibata laho paluahkon hita jolma. Domma itontuhon Naibata hinan Jesus do parmulaan sagala na tinompa in, anjaha ulu ni haganup. Ase marpusat hu bani Jesus do haganup. Seng dong partumbuhan na sempurna i luar ni Jesus. Ise na mencoba-coba sihol manggoluh ia i luar ni Kristus seng sempurna pertumbuhan ni ai. Mombur do ia tapi murmak, seng margogoh. Songon sada suan-suanan anggo sihol sempurna pertumbuhanni anjaha boi marhasil dear, ningon humbani na etek do ia ipupuk anjaha boi ipaborsih bonani. Sonai do hita sihol ma sapodas mungkin hita manggoluh ibagas Kristus, ase sempurna pertumbuhan hita ibagas diri-Ni. Anggo sonai sihol ma hun girah ajari hita dakdanak marsaor, manggoluh rap pakon Jesus marhitei na girah tardidi, anjaha girah na ajarhon Hata ni Naibata bani. Seng pitah vitamin na cukup hansa bereon bani sidea, tapi dihut do vitamin surgawi ai ma Hata ni Naibata.

Sada pasu-pasu do in banta anggo hun girah hita ipaluah Jesus ai Ia do ujung pakon hagogok ni haganup. Ase ise-ise na dob ra manjalo Jesus anjaha domma iselamathon Jesus, domma cukup sempurna ia. Jadi anggo girah hita ipaluah Jesus tontu hundokah do hita boi manaksihon Jesus. Sada tugas anjaha tanggung jawabta do in ase dihut homa hasoman girah manggoluh bani Jesus, ase podas ia manjalo barita pardamean na humbani Naibata. Sadokah sirang janah lang ihagoluhkon sada-sada halak Jesus, lang dong hadameian bani dirini, lape sempurna pertumbuhanni ilobei ni Naibata.

Halani ai anggo domma ipaluah, ipadamei Jesus hita, ulang be hita surut, tapi lambin poltik ma jolom hita haluahon ai, marhitei na tong marsaor pakon-Si ibagas hata-Ni pakon partonggoan pe. Ase tong ma pareksa hita dirinta, marhitei Hata ni Naibata atap na tong ope hita manggoluh ibagas dirini Jesus atap lang.

**Tonggo:** *Ham Tuhan Jesus urupi Ham ma hanami ase tong manggoluh, marsaor, ganup ari ibagas diri-Mu. Urupi Ham ma hanami age laho manaksihon goran-Mu age bani dakdanak nami ase dihut saud sidea maluah. Amen.*

**HALELUYA NO. 319:1+3**

1. Ningon Jesus hasomanku,  
pitah ahu kahou do.  
Rapkon Jesus boi ahu monang,  
talun munsuhkin ganup.  
Seng mabiar ahu ijin,  
Jesus do hasomankin.  
Sai irikononku Jesus  
balosanku mando ijin.
3. Ningon Jesus hasomanku  
bani parlajouan in.  
Tuhan Jesus do parmonang,  
sai pamonangon-Ni au.  
Seng mabiar ahu ijin,  
Jesus do hasomankin.  
Sai irikononku Jesus  
balosanku mando ijin.

PUHO-JONGJONG-MARGOGOH

“Puho ma nasiam, tetap ma jongjong ibagas haporsayaon, gopas songon dalahi anjaha margogoh.”

1 Korint 16:13

Aha do na puho? Na puho ai ma marpardiateihon aha na masa i lambungni. Na puho ai ma na tagam, na mambotoh atap aha pe na masa ilobeini, isamping ni age ipudini. Ase, boi goranon na dob aktif do halak na puho, halani boi do homa ia manlawan sagala tantangan na roh hu bani, atap na mandalankon tugasni pe.

Apostel Paulus mangkatahon: “Puho ma nasiam...” Artini ai ipodahi do hita ase mambotoh haganupan situasi, ase aktip hita laho manlawan munsuhta pakon mandalankon tugasta na iharosuhkon Naibata. Ibagas na puho ai hita lang tarsonggot be bani na masa pakon na sihol masa pe. Nini Lukas 12:37, “Martuah ma juak juak na puho bani parroh ni tuanni”. Tuah ni halak na puho ai ma manjalohon dear layak ni tuahni na roh ai.

Halak na puho, na marpardiateihon ganup situasi ai do na boi jongjong, age ibagas haporsayaon. Jongjong ibagas haporsayaon aima halak na tetap, manjolom haporsayaonni, age aha na masa. Na jongjong ibagas haporsayaon do na boi manaluhon haganupan munsuh-munsuh ni haporsayaon ai, janah na boi mamingkiri haganupan na masa sihol roh.

Ase, halak na puho do na jongjong ibagas haporsayaon, na gopas songon dalahi anjaha margogoh. Ipangindohon ayat on hubanta ase marhiteihon ni na puho, na jongjong ibagas haporsayaon, na gopas janah na gogoh dalankon hita ma tugasta.

Pangrapanta: Ibagas na puho, jongjong janah gopas ai, margogoh ma hita manlawan dousa hamateian.

**Tonggo:** *Tarima kasih ma Bamu Tuhan, halani boi ope puho, jongjong janah margogoh. Urupi Ham ma hanami ase monang hanami ibagas goluhnami. Amen.*

**HALELUYA NO. 178:1-2**

- |  |   |
|--|---|
| <p>1. Puho ho idilo sora,<br/>ni ganup sipatugah mara,<br/>Jerusalem sai puho ho;<br/>Tengah borngin domma susur,<br/>ho anak boru na maruhur<br/>sai ulang ma tarpodom ho.<br/>Roh ma Parunjuk in<br/>pasirsir suluh min,<br/>Haleluya marugas bei,<br/>Hanima 'le<br/>Hu parunjukon bangga in.</p> | <p>2. Dob itangar Sion hata<br/>ni haganup sijaga huta,<br/>mintor malas ma uhurniin.<br/>Ai barah ma roh Huanni<br/>Pargogoh bai hasintongan-Ni,<br/>Ai poltak ma bintang-Ni in.<br/>O Jesus na bujur,<br/>na roh ma Ham botul,<br/>Hosianna, hanami pe<br/>Mangihut bei,<br/>bai balas ni uhur-Mu in.</p> |
|--|---|

MARSITONGGOAN JANAH MARSISOPOTKON DOUSANI

“Ai pe, marsisopotkon dousani bei ma nasiam anjaha marsitonggoan, ase malum nasiam. Na margogoh tumang do pangkorhon ni tonggo ni halak parpintor, anggo ihabujurhon.”

Jakobus 5:16

Marsisopotkon dousani! Marsitonggoan! Dua hata on do na gabe rimpun ni ayat na i atas in hubanta. Marsisopotkon dousani bei artini ganup hita marsada-sada mangakui ai ilobei-lobei ni Tuhanta. Memang, ganup dousanta talar do ilobei-lobei ni Tuhanta. Tapi hambanta sandiri ituntut pangakuan; pangakuan ase isopotkon hita dousanta ai. Lang dousa ni halak na legan, tapi dousanta sandiri do.

Dob honsi iakui hita ai, isopotkon hita dousanta ilobei-lobei ni Naibata, ituntut do homa hubanta ase adong hasadaon banta. Hasadaon ase martonggo, marsitonggoan. Ibagas na iakui hita dousanta i lobei-lobei ni Naibata, tontu ijalo Naibata do hita gabe marsaor pakon-Si. Lang pitah pakon-Si, tapi dihut pakon hasoman na legan. Ase, ibagas na dob isopotkon hita dousanta, tubuh ma hasadaon pakon ni hasomanta, sonai homa hasadaon pakon Tuhanta. Janah pangkorhon ni ai gabe malum hita. Hamalumon ai boi taridah marhiteihon na dear parsauranta pakon Naibata, sonai pakon hasomanta jolma. Hamaluman ai taridah bani malas ni uhurta. Malum nasiam! Artini: Lang be ibagas biar hita roh bani Naibata. Lang be ibagas biar mandalankon hata-Ni. Malum artini totap margogoh mandalankon hata ai. Lang galek songon halak na boritan i bahen dousa. Halak na malum tontu mamorluhon sipanganon. Sipanganon ai ma mandalankon hata-Ni, songon Tuhan Jesus sandiri: “Sipanganon do ai Bangku mangkorjahon rosuh-Ni na marsuruh Ahu ...” (Johannes 4:34).

Jadi anggo isopotkon hita dousanta, tubuh ma hasadaon. Hasadaon ai mangkorhon hamalumon, janah hamaluman ai mambahen marmalas ni uhur hita mandalankon Hata ni Naibata. Janah na parpudi: Mandalankon Hata ni Naibata ai ma tonggo na margogoh, na totap marpasaoran pakon Tuhanta.

*Tonggo: Ajari Ham hanami Tuhan lao mansopotkon dousa nami. Ajari Ham hanami ase marhasadaon pakon hasomannami ibagas na martonggo hu Bamu, ase ibagas hamalumonnami boi hanami mangkorjahon Hata-Mu. Amen.*

HALELUYA NO. 353:2-3

- |   |   |
|---|---|
| 2. Marunduk ni uhur<br>sopotkon ma in,<br>pambaen mu na jahat<br>ampa jungkatmin.<br>Ondoshon bai Jesus<br>bulan dirimin,<br>tongtong ma sai diingat<br>panghopkop-Ni in. | 3. Tangihon Hata-Ni<br>ihutkon ma in,<br>ondoshon dirimu<br>bai gomgoman-Nin.<br>Pangindo bai Tuhan<br>tongtong Tonduy-Nin,<br>pargogoh mangkorjahon<br>Hata-Ni in. |
|---|---|

DILO-DILO DOMPAK NA PORSAYA ASE ITANGIHON

“Jadi nini si Eli hubani Samuel: Laho ma ho, ulaki ma modom, anggo adong use na dilo-dilo bam, hatahon ma: Marsahap ma Ham ale Jahowa, manangi-nangi do jabolon-Mu on. Jadi laho ma si Samuel, iulaki ma modom bani iananni.”

1 Samuel 3:9

Sada hal na so tarpingkiri jolma anggo isuruh modom laho manangihon dilo-dilo. “Modom” ai ma sada kebiasaan laho marsaran mangalop gogoh paima mamungkah horja na mangihut. Tapi sanggah na tarpodom do si Samuel roh dilo-dilo, sada sora na marbeda pakon sora ni jolma. Iagatkon si Samuel do si Eli na mandilo. Halani memang sebagai anak parana si Samuel lape mananda Jahowa. Ai do mambahen ase roh ia marlintun manjumpahkon si Eli: “Tonggor ma, ijon do ahu, idilo ham do ahu”. Tolu hali dob dilo-dilo Jahowa ase iarusi si Eli paboa Jahowa do na mandilo si Samuel. Isuruh si Eli ma si Samuel modom, janah anggo adong na dilo-dilo, hatahononnima: Marsahap ma Ham ale Jahowa, manangi-nangi do jabolon-Mu.

Ra do si Samuel mangkorjahon na hinatahon ni si Eli. Laho ma ia modom janah idilo Jahowa ma ia. Ipadas Jahowa ma Hata-Ni hubani si Samuel pasal haganup na tinontuhon ni Jahowa dompak Israel pakon dompak si Eli.

Hita haganup, na idah hunjai torang ma banta lang sai ipersoalhon Naibata atap na ise hita on, naha statusta atap sanggah panorang ija hita bani dilo-dilo-Ni. Manangihon dilo-dilo-Ni ai do porlu bani Tuhan. Jadi maningon tangi hita dompak dilo-diloni Naibata songon si Samuel.

Hataridahonni dilo-dilo inyatahon bani sikap sebagai halak na porsaya atap ija pe hita on marianan, halani ibagas dilo-dilo ai do Naibata patugahkon aha na sihol baenonni Naibata. Jadi sedo parsoalan: Mase maningon sanggah modom ase roh dilo-dilo. On do masalah negatif mambahen lupa hita paboa na dilo-dilo do Naibata hubani halak na porsaya. Halani situasi na menarik perhatianta na i dunia on gabe lang itangihon hita dilo-dilo ni Naibata. Tapi ijin hita tergoda bani dunia on justru ijai do roh Naibata mandilo hita laho mambere haluahon. Naha sirsir do hita manangihon? Idilo Tuhan do hita halak na porsaya ase itangihon aha ma balosta laho mandalankon ai secara pribadi, keluarga, pakon sa-kuria bahen hasasaudni rencana ni Naibata. Tontu ninta ma marbalos: “Marsahap ma Ham ale Jahowa manangi-nangi do jabolon-Mu on”. Songon si Samuel sirsir manangihon dilo-dilo ni Naibata. Ai maluah do halak na porsaya asal ma idalankon na nitangi humbani Naibata.

**Tongg:** *Ham Bapa, gati do hanami lupa manangihon dilo-dilo-Mu halani hagalekon nami, hurang ni pangarusion nami jolma. Holong ma Ham ajari anjaha parmalo Ham ma hanami. Ase tong sirsir hanami bani dilo-dilo-Mu. Marsahap ma Ham ale Jahowa manangi-nangi do hanami jabolon-Mu. Amen.*

HALELUYA NO. 496:1+3

1. Idilo Tuhan Naibatanta,  
haganup kuria-Ni in.  
Ase manjalo haluahon,  
nabinoban ni Kristus in.  
Tangihon ma dilo-dilo-Ni,  
pateleng ham ma pinggolmu  
Ulang manosal holi dob ni,  
bai ujung ni panorangmu.
2. Jumpahan ulih do ganupan,  
na sirsir manangihon in.  
Na seng onga marsidalian,  
mambalosi Tuhanta in.  
Tangihon ma dilo-dilo-Ni,  
pateleng ham na pinggolmu  
Ulang manosal holi dob ni,  
bai ujungni panorangmu.

PANGAKUAN

“Holong do uhurhu bani Jahowa, halani itangihon do sorangku ampa elek-elekku.”

Psalmen 116:1

Dong dua pahara na sihol patugahon ni ayat on. Na dua pahara ai, in ma na gabe pengakuan ni par-Psalmen on. Na parlobei sihol patugahonni paboa Naibata ai ma Naibata na manangihon sora ampa elek-elek halak na marsuhutan hu-Bani. Na paduahon in ma pasal holong ni uhur dampak Jahowa.

Hunjon taridah balos na topat halani panangihonon ni Jahowa pitah marhitei pangkaholongion do hansa. Na ija pe in lang tarbere balos dampak Tuhan anggo sedo na ibagas holong ni uhur; songon na hinahatahon ni Tuhan Jesus “Maningon haholonganmu do Tuhan Naibatamu...”

Pangakuan ampa balos dampak Tuhan Jahowa, boi do ai marhitei sikap, pambahenan, doding, tonggo, parsoraan, hasaksion pakon pangidangion. Anjaha ijon ipatugah in ma ibagas doding. Idodingkon do Jahowa. Jahowa na mando na gabe dodingni. Tapi aha do mambahen ase pitah Jahowa idodingkon? Iahapkon do pangurupi, pangapition ni Jahowa. Marparsoraan do ia pakon Jahowa. Ipelihara pardomuan na jenges. Martonggo ia, isuhutkon na haru bani goluhni ibagas elek-elek hubani Jahowa. Ipangindo ase iurupi Jahowa ia humbani parmaranan. Haganupan pambahenan, pangindoan ni na madear ai i lobei-lobei ni Jahowa marbalos do. Nini, itangihon do sorangku. “Itangihon do sorangku” ... sedo pitah, haporsayaon pakon pangarapanni na ipatugahni. Tapi on ma humbani na iahapkon na inggot haluahon do ibere Jahowa. Gabe iakuhon ma “holong do uhurhu bani Jahowa”

Tapi sonai pe ra dear anggo padompok hita homa sungkun-sungkun ni Tuhan Jesus songon na bani si Petrus ai, “Holong do uhurmu Bangku”.

Humbani sungkun-sungkun on, boi ma lambin tangkas arti ni holong ni uhur ai. Harosuhta pitah pasangapkon-Si, hata-Ni ma siihutonkon, Ia mando sisombahon, sipasangapon, sihaporsayaon, anjaha ra hita manaksihon, marparsoraan pakon mangidangi-Si.

Ase pardulmit parbagas ni pangkuanta ai do manontuhon holong ni sada halak hubani Jahowa.

**Tonggo:** *Ham Tuhan Naibata Jahowa, Bapanami do Ham, na dob mansarihon goluh nami. Iramotkon Ham do hanami mambahen gok homa malas ni uhur nami. In pe halani holong-Mu saksihonon nami ma Ham na gabe holong pakon tarimakasih nami Bamu. Amen.*

HALELUYA NO. 337:1-2

- |   |  |
|---|--|
| 1. Hu sombah Ham Tuhan tangihon au!<br>Sai uhur-Mu Tuhan pasaud Ham.<br>Sai lambin tambah ma holongku hu Bamu<br>Sai tambah ma holong Bamu. | 2. Sanggah na kahou au,<br>daoh hum Bamu.<br>Sai ipindahi Ham, jumpah Ham au.<br>Halani in holong do,<br>uhurhon Bamu.<br>Sai tambah ma holong Bamu. |
|---|--|

IRIKKON MA!

“Dob itogu sidea parau ai hu darat, itadingkon sidea ma haganupan ai, anjaha iirikkon sidea ma Ia.”

Lukas 5:11

Ikawahkon Tuhan Jesus do haganup j olma, atap pe ai sanggah berhasil, gagal, kecewa, rugi, barang na sonaha pe tene hita marhorja bani goluh on. Sipata idompakkon atap iparjumpahkon do marsasahalak, ase marhiteihonni ai halak na legan boi mangidah isi janah mambuat gunani. Pangkawah pakon parjumpahkon ni Tuhan Jesus sedo pitah hubani sasahalak na tertentu hansa, tapi dihut do age hubani lingkungan mangkawahkon halak, das do homa pangkawah ai bani lingkunganta bei, ase dihut na kawahkon lingkungan diri.

Sonai do ibahen Tuhan Jesus humbani si Petrus. Si Petrus ma sada halak na gagal bani panorang ia. Gogoh, parugas pakon keterampilan dong do hape panorang na lang tarpangunsagahkon, tapi balikni ai, gabe parulihan, pasu-pasu ampa halongangan do, anggo ibere ipakei Tuhan Jesus gogoh parugas pakon keterampilan, pasu-pasu ampa halongangan do, anggo iberehon, ipakei Tuhan Jesus. Tangkas do iahapkon si Petrus kegagalanni ai, nini domma manipat saporngin ai mamakei gogoh, parugas ampa ketrampilanni hape aha pe lang dapot. Hansa ijin do manangar hata ni Tuhan Jesus tubuh bani pangarapan, ra ia mandalankon janah mangirikkon pitah mangunsagahkon hata ni Tuhan Jesus.

Hasoman-hasoman ni si Petrus pe iidah sidea do sikapni ai. Anggo humbani kegagalan hansa hasomanni mangkawah, tontu boi do homa dong na mancela hasirsiron ni si Petrus on. Bani mungkahni lang na botoh aha na mambahen sirsir si Petrus mangirikkon hata ni Tuhan Jesus. Si Petrus pe lang ibotoh aha mambahen ra ia. Dobni pe ase torang, gabe itandai Tuhan do Jesus, itanda homa dirini na gok dousa ai, anjaha na tong sihamalaskonon in ma: Adong hape na sihol sibereon ni Tuhan Jesus, na langsung boi inikmati.

Ternyata humbani parjumpahan anjaha bani na mamingkirkon Tuhan Jesus, tarlobih halani pasu-pasu sibere-bere ni Tuhan Jesus, lambin buha do pangkawah dampak hasoman na legan. Ai idilo do use hasomanni, anjaha ra homa hasomanni roh sedo manonton tapi mangurupi. Ujungni ganup do sidea mangirikkon Tuhan Jesus.

**Tonggo:** *Ham Jesus, panatap-Mu do mambahen mararti gogoh na dong ronsi habotohonami. Bere Ham manggoluh pangarapan na hun-Bamu i tongah-tongahnami, ase itanda hanami Ham, dirinami, anjaha iirikkon hanami Ham! Amen.*

**HALELUYA NO. 107:1-2**

1. Irikkon nasiam ma Au,  
sonai nini Tuhanta.  
Sai parnalang ma dirimu,  
Hatang-Ku malah harga.  
Sai mambur bahenlah ganup,  
parlahoumin na so talup.
2. Au do palihar dalanmin,  
na dampak hagoluhan;  
Ai seng be kahaou langkah min,  
daoh pakon hamagoan.  
Au parhiteian na bujur  
bai hasonangan na botul.

## PARMAHAN NA MADEAR 16 JANUARI

### HAROSUH NI NAIBATA

**“Anjaha ulang ma sarupa nasiam pakon dunia on, tapi mubah ma marhitei habayuon ni uhur, ase boi nasiam manimbangi atap aha do rosuh ni uhur ni Naibata, ai ma na madear, harusuh ampa na gokan dear.”**

**Rom 12:2**

Marhitei teks on ipangindo Tuhanta do ase ulang sarupa pargoluhanta bani adat pakon tabiat ni dunia on. Artini ai age pe i dunia on ope hita sonari, anggo siabakkonon sedo abak dunia, tapi harusuh ni Naibata ma.

Harosuhni Naibata boi jumpah bani hata pakon pambahenan na dob ipatugah janah iondoskon hubanta. Ase harusuhni Naibata lang tubuh ai humbani uhur pakon pingkiran ni hita jolma. Masihol hita Bani ampa gabe harusuhni Naibata, porlu ma hita pangkei anjaha, tanginan bani Hata ni Naibata.

Bani haporluan mangidah ampa manjalo harusuhni Naibata ihaporluhon do homa hamubahon ni uhur. Hita sedo pitah mangkawahi pakon mamareksa pasal na sonaha ma harusuhni Naibata ihaporluhon do homa hamubahon ni uhur. Hita sedo pitah mangkawahi pakon mamareksa pasal na sonaha ma harusuh ni Naibata.

Boi do na botoh sonaha ma tongon harusuh ni Naibata age pe lape mubah uhur. Hansa sadokah hita pe lape ibagas mubah ni uhur hita lape tarbahen marosuh bani harusuh ni Naibata. Tapi anggo domma ipaubah hita uhurta anjaha uhurta pe domma bayu, ijai pe ase boi malas ni uhur manjalo, manangihon, mangkagoluhkon Hata ni Naibata.

Halani ai, hamubahon marhitei na pabayu uhur, ganup panorang do on ituntut Tuhan hubanta. Parlahou, parsahap, pangabak, pingkiran lang be songon na i dunia on, na so pala dong panimbangion. Humbani hamubahon ni uhur tubuh ma panimbangion, atap harusuh barang hagigi ni Naibata do ai. Gabe ibotoh hita ma aha sibahenon, sihatahonon, pakon sihagoluhonkon. Anggo domma na botoh sonai, ai ma na madear, ampa na gokan dear.

Nini si Paulus, termasuk halak na so maruhur ampa na oto do na so mambotoh atap na so mangarusi Hata ni Naibata. Anjaha na isobut maruhur in ma na mangarusi harusuh ni Naibata. Na madear, na iharosuhkon Naibata in do sibahenon sadokah голуhta.

**Tonggo:** *Ham Tuhan Naibata, bere Ham ma uhur na bayu bannami ase ibotoh hanami mambahen na madear harusuh-Mu, na gabe puji pujian nami Bamu. Amen.*

### HALELUYA NO. 141:1+5

1. Jesus, Rajani Kuria  
na pansing janah porsaya,  
pasu-pasu Ham au on.  
Sai papuho Ham uhurhu  
mangirikkon Ham Rajangku,  
Pargogohi Ham au tong,  
Pargogohi Ham au tong.
5. Sai pauli Ham Kuria,  
'se harusuh-Mu isura  
haganup pagori-Mu;  
halak na toruh maruhur  
na magigi bai na sambor,  
Sibalosi hata-Mu,  
Sibalosi hata-Mu.



## PARMAHAN NA MADEAR 17 JANUARI

### TOKTOK HITEI

**“Marhiteihon-Si jumpah hita do hinsah ni uhur ampa dalam masuk ibagas tenger ni uhur halani haporsayaon Bani.”**

**Epesus 3:12**

Dong do sada podah i Simalungun na mangkatahon: “Toktok Hitei”. Hata podah on mararti “bahen dalanni... dalam ni dalam”. Hitei atap dalam on sada hal na penting do on, na tarpausih do gan ai humbani urat nadi. Ijin lang dong dalam atap hitei sonaha pe maningon terpencil ma (anggo tarpausih hubani daerah atap ianan), halani na boi kaluarhonon atap pamasukon pe tarbatas ma. Ase ibagas haganup gati do sungkod usaha halani na so adong dalam. Malahan age pe paruntungan ma namin, tapi pambahenan ni na so dong gabe lang hinsah uhur.

Bani hata ni Tuhan Naibata, ipatugah banta paboa domma dong dalam, anjaha domma iresmihon boi dalanon. Lang marbatas muatan na boi boanon lewat hun dalam ai, tapi ase boi sintong sihol ma use humbani dalam na pinarsirsir ni Naibata.

Jesus do dalam ai anjaha Ia do homa hitei. Sasintongni lang dong alasan, lang marhinsah ni uhur marhitei Tuhan Jesus. Dalam ampa hitei na so ra maseda do Tuhan Jesus, na dob taruji. Jonam do Ia, gabe mardalan hunjai lang pala gobir. Lampot do dalam na pinasirsir marhitei Tuhan Jesus, anjaha paruntungan do ronsi das hubani ujungni.

Keadaan ni dalam na pinasirsir Naibata on do na mambahen boi hinsah uhur anjaha tenger uhur. Marhitei horja pambahenan ni Tuhan Jesus domma ipatarlar hubanta ise la, anjaha tartogu hita hu haporsayaon. Halani ai ibagas haporsayaon na dob dong banta pakei hita ma Jesus, patalarhon Naibata ibagas na mangayaki harosuh-Ni. Bahen hita ma harosuh-Ni gabe harosuhta.

Ase anggo domma iparujahon hita dalam/hitei Tuhan Jesus ai lang sungkod be langkahta, lang tarpulou be hita. Sonai age pasu-pasu lang halaosan ai Ia do dalam ni pasu-pasu ai banta. Sungkup ma pitah Jesus bahen hita dalam, ai nini Tuhan Jesus: “... Seng adong na das hubani Bapa in, anggo seng marhiteihon Ahu”.

**Tonggo:** *Ham Jesus, pitah Ham do tongon dalam bennami. Haporsayaonnami pahot Ham, ase hinsah janah tenger uhurnami mangirikhon Ham. Amen.*

### HALELUYA NO. 121:1-2

1. Jesus, goluhni tonduyhu,  
Ham do haporusankin.  
Anggo tumpu bai tonduyhu  
bolis pakon setan in.
2. Jolom au Jesus Tuhanku,  
jolom au sai tongtong  
ulang sirpang bei naheihu  
humbai dalam na sintong.

## PARMAHAN NA MADEAR 18 JANUARI

### BAHEN MA SONGON NA HUBAHEN IN

**“Ai sitiruon do Hubere bannima, ase ibahen hanima songon na Hubahen in bennima.”**

**Johannes 13:15**

Bani goluhni jolma i dunia on dong do ibere Naibata dua sifat na iboan tubuh sipakeion ni jolma laho mampartahankon hagoluhanni, ai ma: *sihol mangan* pakon *sihol mambotoh*. Sadar do hita atap lang, na dua on, dong bei do bani hadirion ni ganup jolma.

Sihol mangan, ai ma sada tanda laho pabanggalhon parangkulaon. Anggo lang be hita on marosuh mangan ampa minum, sada tanda atap na laho manadingkon dunia on ma ai.

Anggo adong ma sada na baru sihol tong botohon ni uhur ni jolma. Mardasar hubani hauhuron ni jolma sai na horahan loheian do tongtong bani habotohon. Jadi anggo pala ma marsaran uhurta bani na masa atap na baru dong, tong ma ai na dohor ma hita laho manadingkon dunia on. Ase marhiteihon ni habotohon na tongtong iparlajari boi jolma in manambah pambotohni laho marhorja, ase sungkup itandai dalan-dalan laho mangkorjahon atap pe mansarihon goluhni i dunia on. Domu hujon sai iparlei-lei jolma do marlajar tongtong. Apalagi i dunia on sai na marubah-ubah do tong na masa sihadapon ni jolma. Anggo lang iparlajari hita ai atap lang sihol botohonta tading i pudi mando tong hita lalab, lang be tarihutkon hita margoluh na madear.

Bani sihol mambotoh ai, sihol do homa jolma mambotoh pasal Tuhan. Deba halani doras ni sihol ni gabe ikarang-karang ma sonaha hadirion ni Tuhan. Tapi halak na sonai ai lang saud mambotoh pasal Hata ni Tuhan. Tongon sintong sada do dalan ase itandai hita Tuhan, ai ma marhitei na marlajar humbani Hata ni Tuhan.

Tuhan Jesus sandiri, ai ma Hata ni Naibata na gabe jolma. Anggo sihol ma hita tongon-tongon marlajar pasal Naibata torih hita ma hubani Tuhan Jesus. Bani Tuhan Jesus talar ma haganup. Hata-Ni do ihagoluhkon janah goluh-Ni do ihatahon. Halani ai do mambahaen ihatahon Tuhan Jesus, sitiruon do Hubere bannima, ase bahen hanima ma songon na Hubaen in bennima.

Bani na manjalo Hata ni Naibata bani Bibel in sai bagei do pandopot atap pe tafsiran ni jolma. Bahat do na marondolan hubani pambotoh ampa hapistaranni, tapi dingat hita ma ulang marguru bani hapistaran ni jolma laho mananda Tuhan. Tapi marhitei na marlajar hubani Tuhan Jesus ma hita tongtong. Tuhan Jesus do guru banta, bani ganup goluhta ase sintong hita i lobei ni Naibata. Naha domma tongon hita marguru anjaha maniru Tuhan Jesus bani goluhta?

**Tonggo:** *Ham Tuhan Naibata Bapanami, marhitei Tuhan Jesus Kristus. Bere Ham ma hubennami Tonduy-Mu Napansing in ase ibobai hanami tongtong marguru hui-Bamu, maniru ganup pambahenan-Mu ronsi Anak-Mu Tuhan Jesus Kristus Tuhan nami. Ibagas idop pakon holong ni atei-Mu, jalo Ham ma tonggonami. Amen.*

### HALELUYA NO. 115:1+5

1. Sadokah ho i tanoh on,  
papintor uhurmin, padingat -  
dingat ma tongtong nidok ni  
Tuhanmin.
5. Sai tiru Tuhan Jesus in  
na roh manghopkop ho  
pambaen-Ni ge Hata-Ni in  
hagoluhanmu do.

PAULI RUMAH PANUMBAHAN

**“Tangkog ma hanima hu dolog, tarui hanima ma parhayu, anjaha pauli hanima ma rumah panumbahan ai, ase marosuh ni uhur Ahu ijai, anjaha marsangap Ahu, nini Jahowa.”**

Haggai 1:8

Malas uhur mangidah age bani panorang on pe, halani ihaporluhon anggota ni kuria do pajongjongkon rumah panumbahan bani Naibata, ai ma gedong Gereja. Deba das do bani na marbiaya marpuluh juta rupiah. Aha do nani na mambahen in? Ai ma halani dong haporsayaon na manggoluh bani halak Kristen ronsi bani panorang on. Sada kewajiban do pajongjong rumah panumbahan bani halak Kristen, ase boi sidea torsa manangihon Hata ni Naibata irik mamuji pakon pasangapkon goran-Ni. Ase boi do hataonkon buah ni haporsayaon do, usaha pajongjong rumah panumbahan atap gereja-gereja.

Sadalan hujin homa do ase porlu ma homa iusahahon Kuria in haporluan parlajaran pasal Hata ni Naibata bani Sikolah Minggu pakon Parguru Manaksihon, ase dong bani sidea sada pambotoh janah pambotoh ai ma na gabe ondolan bani sidea. Tapi bani pangidahta rombang, anggo haporluan buku pelajaran agama atap pe pembangunan partonduyon na utama margoran peralatan pasal pelajaran bani Hata ni Naibata, lang onga ibahen hita anggaranni marjuta rupiah.

Ulang antara marjuta, marratus ribu pe lang, hataonkon ma tene marpuluh ribu pe hampir lang. Ijon ma porlu bahen hita paretongan ibagas langkah sonai age ibagas uhurta, sonaha anggo mambangun gedong dong duit marjuta rupiah hape mambangun pasal pambotoh bani Hata ni Naibata lang adong ibahen biaya untuk ai. Lupa hita ia rumah panumbahan na iharasuhkon Naibata ai ma rumah na mambangun partonduyon. Mambangun rumah panumbahan, mambangun partonduyon ni anggota ni Kuria in do maksud utama.

Bangunan Gereja mentereng, hape bangunan partonduyon burburon, seda do. Ase lang honsi jumpah bangunan partonduyon bani rumah panumbahan, sedo bangunan na hinarosuhkon ni Naibata ai. Sonaha ma hita boi mangidah ai? Ai lang porlu do jenges Gereja? Porlu do, janah boi do hita mangidah sonaha ma na hinarosuhkon ni Naibata.

Jolma na porsaya in do siidangan ni pembangunan ai. Ibangun Gereja-gereja laho mambangun partonduyon do. Torih ham ge. Sirsir pe meja pakon kursi, sonai pakon cangkirni ampa ganup alat na porlu sanggah mangan, anggo lang honsi do margizi sipanganon ai, parsuma ganup perlengkapan ai. Bosur do boltok pitah na bosur tumang do. Ai do homa na ihatahon bani 1 Korint 3:16, “Ai seng ibotoh nasiam Rumah ni Naibata do nasiam anjaha Tonduy Napansing ni Naibata marianan ibagas nasiam?”

Ase, marusaha ma hita tongtong ase marosuh Naibata marianan banta anjaha marsangap Ia ibahen hita. Ijon ma irik hata pakon pambahenan janah na hinarasuhkon ni Naibata.

**Tonggo:** *Ham Tuhan Jesus Tuhannami, pormaloi Ham ma hanami mangarusi Hata-Mu, pakon mandalankon ganup goluh nami ase tongon ibagas na marbanggal hanami bani Harajaon-Mu. Bani pembangunan na idalankon hanami andohar ma na hinarosuhkon ni uhur-Mu. Amen.*

**HALELUYA NO. 493:1**

1. Naha do pangidahmu, pargoluh ni Kurianta.  
Naha do pangahapmu, anggo buei na lang marminggu.  
Naha hasirsironmu, lao mangarahkon hasomanta.  
Ase sai ringgas marminggu, ulang lungun Gareja in.  
Dong do alinan ni umpasa, in ma umpasa na marisi podah  
Borit dingis na lang marasar, boritan do asar na lang mardingis  
Nai do homa age kuria, na marnaloja pajongjong Gareja.  
Borit Kuria lang mar-Gareja, boritan Gereja lang mar-Kuria.  
Halani ai, ulang lansei uhurta, torsa ma hita marKuria.  
Tuhanta ma, tongtong sibalosanta, ai Ia Rajani Gareja.  
Sai ringgas bei!

GANUP MAMAREKSA HORJANI BEI

**“Tapi ganup mamareksa horjani bei; jadi halani dirini tumang ma ia mamuji-muji diri, sedo na halani na legan.”**

**Galatia 6:4**

Nini parilmu jiwa, halak na mananda dirini sintong, ibotoh aha hagalekonni ampa hagogohanni, halak na sonon ma igoran sada halak na pistar. Anjaha halak na so mananda dirini, na lang ibotoh dirini, na so normal ma ai. Na hurang ma sada halak anggo lang ibotoh patibal dirini itongah tongahni parsauranni.

Sonai ma halak Parisei pakon Sibotoh Surat ilobei ni Tuhan Jesus, lang itanda sidea aha hahurangan ni sidea. Ninuhur ni sidea, sidea ma tang na botul. Na salah do Tuhan Jesus, das hubani na barani sidea mambahen haputusan, na manangihon marutang hosah do Tuhan Jesus, anjaha ningon iparsilangkong. Naha do dalanni ase ibotoh anjaha itanda hita dirinta sintong atap pe na salah? Anggo marhitei na mambanding-bandingkon bani halak na legan do ibahen hita, lalab ma lang saud itanda hita dirinta, sintong atap lang ilobei ni Naibata. Tapi nini anggo irigapi hita dirinta marhitei Hata ni Naibata, ijai ma saud dapot hita balos na sintong. Ai Hata ni Naibata do ukuran na sonaha ma tongon pardongni hadirionta, ampa haganup na binahenta.

Domu hujon ma iondolhon Apostel Paulus hubani Kuria Galatia ai, ase ganup sidea mamareksa dirini bei marhitei sorminan Hata ni Naibata. Marhiteihonni Hata ni Naibata, ilobei lobei ni Naibata, pardousa do hita haganup. Ganup na binahenta in, sada pe lang boi anggarhononta, ai gogoh pakon pasu pasu na humbani Naibata do ase boi idalankon hita ai. I lobei ni Naibata torang parutang do hita, pardousa do hita haganup. Lang adong siunsagahkononta. Tongon ma idop pakon holong ni atei ni Tuhan tumang mando siunsagahkononta. Ase ulang pala hita, mambanding-bandingkon dirinta bani hasomanan na legan. Ai pitah ibagas idop ni uhur ni Naibata do hita ase maluah.

Ibagas idop ni uhur Naibata na jinalonta ma hita mamuji-muji Naibata. Pakon hata na legan, hot marhaporsayaon ibagas Jesus Kristus. On ma na imaksud simalaskononta, on ma homa sipujionta bani dirinta, anggo ibagas Tuhan Jesus hita manggoluh. Naha domma tongon hita ganup manggoluh ibagas Jesus, bani ganup ari ari goluhta?

**Tonggo:** *Ham Tuhan Naibata. Tongos Ham ma haliharon-Mu hubannami, ase itogu hanami manggoluh ibagas Hata-Mu bani ari-ari ni goluhnami. Ai lang dong na madear bani dirinami anggo lang marhiteihon ni idop pakon holong ni atei-Mu. Marhiteihon ni Tuhan Jesus Kristus, jalo Ham ma tonggo nami in. Amen.*

**HALELUYA NO. 241:1+3**

1. Malas do tong uhurhon,  
bani Jesus na tongtong,  
mangindahi hajolmaon,  
ase Ia paluahkon,  
jolma manisia in,  
humbai hamagoan in.
3. Malas do tong uhurhon  
ai parrupeu au tongon.  
Bani arta na maharga,  
pinarbagah ni Tuhanta;  
Bai ganup na bujur in,  
mangirikkon Jesus in

AMBILAN NA MADEAR IN PATOGUHKON HAPORSAYAON  
AMPA PATUBUHKON HOLONG

“In ma na dob adong bani nasiam, age i sab dunia on; na marbuah do in anjaha lambin marbanggal, songon na bani nasiam, mulai humbani panorang, dob ibogei nasiam anjaha itanda nasiam idop ni uhur ni Naibata ibagas hasintongan.”

Kolosse 1:6

Malas ni uhur Apostel Paulus mangidah Kuria Kolosse halani torus do martambah haporsayaon ni pagori ni kuria ai. Tangkas do ai taridah bani goluh ni sidea siganup ari, lambin roh dear ni do parsauran ni sidea samah sidea, lambin marsihaholongan do sidea, pingkiran ni sidea pe lambin tartuju do hubani haluahon na ipasirsir Naibata i Surga. Seng parsuma Ambilan na Madear na dob isuanhon hinan i kuria ai; dob isuan, tubuh, marbanggal, berkembang anjaha marbuah do torus.

I dunia on pe taridah do perkembangan ni Gereja-gereja, roh buei ni do na porsaya, na pataridahkon buah ni Ambilan na Madear in marhitei horja na madear in. Songon na i Kolosse ai, buei do perobahan bani goloh ni jolma i dunia on. Gabe marbuahkon buah-buah humbani Tonduy in.

Hubanta pe domma isuanhon Ambilan na Madear in. Hampir ma sada abad ai ipadas banta i Simalungun. Hunjia nari das bani sonari, tubuh do Ambilan na Madear in, marbanggal anjaha marbuah do homa, marhitei na tiap tahun do tambah bilanganni na porsaya hubani Tuhan Jesus Kristus. Ase marhiteihonni aima homa dihut hita pataridahkon buah-buah ni Ambilan na Madear in bani goluhta, gabe tartogu halak na legan mangkaporsayai Naibata ibagas Jesus Kristus.

**Tonggo:** *Tarima kasih ma Bamu Tuhan, ai ipadas Ham do Ambilan na Madear in bannami. Urupi Ham ma hanami pataridahkon buah-buah ni Ambilan na Madear in marhitei Tonduy-Mu, ase tartogu halak na legan porsaya hu Bamu. Amen.*

HALELUYA NO. 326:1+3

1. Tentera ni Jesus maju ma torus,  
porsan ma silang-Ni ase monang  
ham, Ia puanglima sai ihutkon ma,  
masuk ham marporang lawan  
musuhmin. Tentera ni Jesus maju  
ma torus sai ajamkon Jesus ase  
monang ham.
3. Ai sada do hita angkula-Ni in,  
Ia do ulunta sibalosan in.  
Sada haholongan na porsaya in,  
ronsi pangarapan hasadaon in,  
Tentera ni Jesus, maju ma torus,  
sai ajamkon Jesus ase monang ham.

HAM PAKON KELUARGAMU

“Haporsayai ma Tuhan Jesus, ase maluah ham pakon parumahmu!”

Lahoan ni Apostel 16:13

Marhaporsayaon hubani Tuhan Jesus, ai do dalan haluahon. Lang dapot hita haluahon anggo marhitei horja, pakon pambotohta do. Horja na madear na ihorjahon hita ai ma buah ni haporsayaon ai. Anggo ihatahon: “Haporsayai ma Tuhan Jesus” artini ai: Ase martenger uhur hu Bani ma hita, pitah hu Bani ma hita mangindo pangurupion pakon marpangarapan. Hum Bani ma jalo hita hasasapan ni dousa, anjaha pitah sahalak-Si ma sisombahon pakon sipujionta; lang adong be Tuhan na legan bai goluhta on.

Ayat on mangkatahon: “Haporsayai ma Tuhan Jesus ase maluah ham pakon parrumahmu!”. Sonaha do maksud ni ai? Na mangkatahon bahasa i tongah-tongah ni keluarga in, sungkup ma pitah bapa porsaya hubani Tuhan Jesus? Anggo domma porsaya bapa, mintor langsung ma niombah pakon inang i rumah maluah? Lang ai na imaksudhon. Maningon haganup porsaya. Bani 34 ai ihatahon do: “Haganup do sidea manjalo Hata ni Naibata, ... haganup sidea porsaya”. Anjaha ibagas bagian na legan humbani Bibelta pe tangkas do ihatahon bahasa parroh ni Tuhan Jesus hu dunia on ai ma na laho paluahkon sagala na porsaya Bani (Johannes 3:16).

Ase anggo masihol maluah hita sekeluarga, maningon haganupan anggota keluarga ai ma mangkaporsayai Tuhan Jesus. Keluarga ni Kristen, ai ma keluarga na marhaporsayaon hubani Tuhan Jesus. Bapa sebagai kepala keluarga, ai ma namin na gabe panogu-nogu hubani niombah pakon inang i rumah, ase haganup keluarga ai mangkaporsayai Tuhan Jesus. Tapi anggo lang idalankon bapa ai sonai, boi do homa inang na gabe panogu-nogu, sonai homa age niombah. Ase marhiteihon ni ai, taridah hasadaon ni keluarga ai, na ra marsitogu-toguan ibagas haporsayaon. Halani sanggah i dunia on do hansa hita boi marsiajar-ajaran, marsiarahan, marsipodah-podahan ase porsaya bani Tuhan Jesus.

Ase hita halak Kristen, haganup ma hita ibagas keluarganta mangkaporsayai Tuhan Jesus, ase maluah hita ganup.

**Tonggo:** *Urupi Ham hanami Tuhan, ase pitah marhaporsayaon hu Bamu hanami, age manggoluh hanami i tongah-tongah ni bahat parhaporsayaon na legan inggot hanami. Amen.*

**HALELUYA NO. 105:1**

1. Hanami na satangga on,  
i lobei-Mu, o Jesukin,  
Ham ihutonkon nami.  
Ham ma ompung ni hanai on,  
sadokah na marhosah in,  
sai pasu Ham hanami.  
Ham ma Raja  
ihutonkon, pangguruan;  
sisungkunon  
tong bai Hata-Mu, o Tuhan.

SIMADA HAGOLUHAN

“Simada Anak in, bani do hagoluhan in, na so simada Anak ni Naibata, seng bani hagoluhan in.”

1 Johannes 5:12

Haganup do jolma mangkasiholhon ase gabe parsimada bani hagoluhan na sadokah ni dokahni. Janah sungkun-sungkunni na mangkasiholhon hagoluhan ai aima: Aha do sibahenonku ase bangku hagoluhan na sadokah ni dokahni ai? Sonaha do ase bangku hagoluhan na sadokah ni dokahni ai?

Nini hata on “Simada Anak in, bani do hagoluhan in”, halani ibagas Anak in do hagoluhan in. Bani Bahasa Indonesia tarsurat, “Barang siapa memiliki Anak, ia memiliki hidup”. Jadi simada Jesus do simada hagoluhan na sadokah ni dokahni. Sonaha do na imaksud simada Jesus do simada hagoluhan na sadokah ni dokahni. Sonaha do na imaksud simada Jesus? Nini sahalak “Mangkatahon Jesus aima Tuhan, na mambotoh sejarah hansa ope ijia, lape simada Jesus ia ijai. Simada Jesus aima na mangakuhon: Jesus ai ma Tuhanku. Jesus adalah milik kepunyaanku. I goran kata ganti kepunyaan “ku”. Simada Jesus na mangakuhon sonon mangakui Jesus Naibata ni, Jesus sisombahonni, Jesus pangajamanni, Jesus hatengaran ni uhurni, Jesus panungkunanni, Jesus pangalopan pasu-pasu pakon gogoh bani. Ipatunduk dirini hutoruh ni kuasa pakon harosuh ni Jesus bani goluhni ari-ari. Lang be iagan bagianni goluhni. Lang be uhur-uhurni bani goluhni. Simada Jesus, ia do simada hagoluhan na sadokah ni dokahni. Simada Jesus, ia do simada hagoluhan, na mutu atap kwalitasni songon mutu ni goluh ni Jesus bani horja pakon pangidangion-Ni.

Sihol banta hagoluhan na sadokah ni dokahni? Parsimada hita bani Jesus.

**Tonggo:** *Ham Jesus Tuhannami, bennami ma Ham. Ase bannami hagoluhan na sadokah ni dokahni. Tarimakasih ma Bamu. Amen.*

**HALELUYA NO. 11:2-3**

2. Pardimata Ham uhurhu,  
rajai Ham ma diringkon.  
Ham do tong pangarapanku,  
sipagoluh tonduyon.  
Uhur-Mu na mando bangku,  
bangku Ham Bamu au on.
3. Holong atei-Mu hubangku,  
in hupindo hu Bamu.  
Sibereon-Mu Tuhanku,  
bai sijalo Hata-Mu.  
Uhur-Mu ma lah hubangku,  
pasaud Ham ma Hata-Mu.

MANGGILA ULANG MARDOUSA

“Anggo manggila nasiam ulang ma mardousa! Ulang ma sundut mata ni ari, lang mintop ringis nasiam.”

Epesus 4:26

Tubuh jolma in ibagas dousa do, gabe biak si gilaan do hita ganup humbani mungkahni. Tapi halani holong ni Naibata ijalo use hita gabe huan-huan-Ni. Ai Nini do: Hinan seng bangsa ni Naibata nasiam, sonari nani bangsa-Ni ma. Hinan seng dapotan idop ni uhur nasiam, sonari nani dapotan idop ni uhurma (1 Petrus 2:11). Isobut hanami on, gendo ibotoh hita mangkaholongi porini manggila pe hita dampak hasoman.

Manggila memang hal na manusiawi, sehingga sipata seng tarelakkon setiap jolma. Tingkat kesibukan pakon pengaruh negatif kemajuan jaman ampa tantangan hidup na semakin kompleks hotop manjerumushon hita hubani na sering manggila. Porlu do jagaonta anggo manggila ulang namin i golongkon hubani na extrim. Anggo on terjadi mintor parsahap pakon tindakan pe seng tarkontrol gabe lang sadar dampak situasi. Ulang manggila dob ni gabe domdom atop gabe borit ni uhur lanjar seng marsisahapan ronsi piga-piga dokah. Pahara songon na sinobut on atop na marpardomuan, hujon ma ipaingat ayat na ibabou in hita.

Pareksa pakon uji hita motivasi bani na manggila. Ase ulang otik-otik manggila barang tongkin-tongkin manggila na gabe isobut hita pamarah. Anggo na ahapkon seng dong gunani manggila pindo hita ma gogoh ase mampu hita manahan emosi. Selaku halak Kristen, maningon bereonta do kesempatan hubani Tonduy Napansing marhorja ibagas goluh laho palamlam uhur.

Manggila ulang mambere peluang hubani sibolis marhitei na bertahan bani milas, mohop ni uhur. Janah itambahkon ase ringista ulang soppat melewati batas. Sipadaohon do uhur domdom, sogam ni uhur, gattih hita ma uhur holong ase marhasonangan, ampa mardamei dampak ganup jolma.

**Tonggo:** *Ham Tuhan Naibata Bapanami, pargogohi Ham ma hanami manasap dousa ni hasoman na mardousa dampak hanami, songon Ham na dob manasap dousa nami. Amen.*

**HALELUYA NO. 250:1+4**

1. Haholongan na mapansing  
Humbai Jesus Tuhankin;  
sai sogopi, sai masuki;  
uhur ampa Tonduy hin.
4. Sai palumbang Ham uhurhu  
bai ganup hasomankin.  
Ase sai ringgas uhurhu,  
lao manasap dousaniin.



PARMAHAN NA MADEAR

“Ahu do Parmahana Na Madear, Hutanda do na Bangku, anjaha itanda sidea do Ahu.”

JOHANNES 10:14

Jesus do Parmahan Na Madear. Anggo ihatahon Tuhan Jesus ijon Ia do Parmahan Na Madear sedo na mararti ai salah sada hambai buei parmahan na madear, tapi patugahkon lang dong parmahan na madear sobali Tuhan Jesus.

Parmahan na madear ai ma na mangutamahon haporluan ni na pinarmahanni, janah sebalikni parmahan na so madear ai ma na palobeihon haporluan sandiri na hambani na pinarmahanni.

Parmahan na madear sedo pitah mangutamahon kebutuhan ni na pinarmahanni ronsi na mambotoh haporluon ni na pinarmahani, tapi ronsi na sirsir mamberehon na porlu bani goluhni gabe haluahon pakon hatuahon ni na pinarmahanni.

Parmahan na madear ai ma homa na tangkas mananda na pinarmahanni ronsi na mambotoh haporluann ni na pinarmahanni ai. Partinandaan ai do patubuhkon parsoran pakon holong. Itanda Tuhan do hita anjaha ibotoh anjaha isarihon do na porlu banta. Sebagai halak Kristen hita maningon sirsir do hita iparmahanni Tuhanta marhitei na tangian hita bani sora-Ni ase sora ni na legan. Hata-Ni ma bahen hita na gabe onjolan ni goluhta. Ibagas hubungan hubani Tuhanta pataridahkon dong do dua fungsi atap kedudukanta ai ma: Sahali sebagai biri-biri na pinarmahanni Tuhanta, janah sahali homa iondoskan do hubanta tugas parmahan laho marmahani ganup na iondoskon ni Naibata hubanta.

Sebagai biri biri ni Naibata maningon do tangi hita bani sora ni Parmahanta janah marhitei na tangi hita gabe ibedahon hita sora-Ni hambani sorani na legan gabe boi hita manggoluh ibagas malas ni uhur bani goluhta sonari pakon magira. Sebagai parmahan na ipercayahon Tuhan hubanta ningon tiru hita ma parmahanionni Tuhanta, halani sada panorang ningon do partanggungjawabhononta haganup na dob iondoshon-Ni hubanta. Tongtong ma hita martarima kasih bani Tuhanta marhitei parmahanion-Ni. Janah parmahanni hita ma na niondoskon hubanta na songon hatarimakasihonta hubani Tuhanta. Holong bai Tuhan ai ma dasar ni parmahanionta.

**Tonggo:** *Tarima kasih ma bamu Tuhan halani parmahanion-Mu bani goluhnami, ipasirsir Ham do ganup na porlu bennami, janah ipaluah Ham do hanami hambani munsuh nami. Ajari Ham ma hanami marmahani sagala na iondoskon bennami. Amen.*

HALELUYA NO. 127:1-2

1. Jahowa si parmahan au,  
aha pe lang hurangni.  
Na sambor pe sai ipalao,  
do hambai pinahan-Ni.  
Tudu ibaen na lambut in.  
Lao pagoluhkon tonduyhin  
ibahen holongni atei-Ni.
2. Itogu au bai na lihou,  
bah tubuh hagoluhon.  
Ibahen do tonduyhin siou,  
bai dalan hasonangan.  
Sonang do uhurhon tongtong,  
sadokah au i tanoh on,  
pasangapkon goran-Ni.

HIDUP TANPA STRESS

“Na ibabou ai ma paruhurhon nasiam, ulang ma na i atas tanoh on.”

Kolosse 3:2

Zaman sonari ai ma zaman hamajuon. Buei jumpah hita perobahan-perobahan i bidang teknologi, komunikasi, pendidikan age bani bidang na legan na mambobahon hita hubani goluh na lambin torsani (Modern).

Sobalikkon perkembangan na positip ai, taridah do homa dampak negatip ni. Ai hotop do ai mambobahon hita hubani goluh na lambin roh daohni hambani harusuhni Tuhan in. Taridah do ai marhiteihon pergeseran nilai kehidupan masyarakatta in sandiri, ija sifat kebersamaan atap kegotongroyongan domma mulai salih gabe sifat individualistis. Mementingkan dirini sandiri, hisap-hisapni ampa rosuh-rosuhni. Songon sada falsafah na mangkatahon: “Petiklah apa yang dapat dipetik, nikmatilah apa yang dapat di nikmati, bila hidup ini berakhir selesailah semuanya”. Podah si sonon domma muncul bagei-bagei bentuk janah menguasai budayanta panorang parpudi on. Nai homa holong ampakon ikatan kekeluargaan lambin tipis.

Ibagas situasi si sonon buei ma jumpah hita hamaholan-hamaholan. Jumpah do ketegangan-ketegangan hidup antara na sada pakon na legan. Ibagas parsauranta hita sama hita. I tengah-tengah ni keluarga, masyarakat, age bangsa pakon negara pe. Bingung lang na botoh aha na sihol sihorjahonon. Dob ni “Stress”, na mangkorhon keputusan, pesimis, lang marpangarapan.

Bani na mandompakkon situasi ni pargoluhanta sonari on, sada do hansa sijolomanta aima lambin tingkatkononta ma parsauranta dampak Tuhan in. Na ibabou ai ma tongtong paruhurhononta, aima Jesus Kristus in sandiri. Tanpa Kristus sisoya-soya do goluhta. Kristus do na sanggup mamberehon hadameion, malas ni uhur ampakon pangarapan banta. Mandaoh do pusok ni uhur, holsoh, gobir, keputusan hun tengah-tongahta, anggo tongtong ibagas Kristus in hita.

Barang ise na mambahen Jesus gabe onjolan ni goluhni, imampuhon do ai laho menghadapi pardalanan ni goluhni. Jesus Kristus sandiri do marhiteion Tonduy Napansing na mambere gogoh na baru, semangat na lang onggamintop, habaranion, malas ni uhur ampakon gogoh bani horjanta. Anggo sonai parlobei ma pindahi hita Harajaonni Naibata ampa Hapintoranni do aha na porlu banta ase sanggah na i dunia on ope hita.

**Tonggo:** *Ham Tuhan Jesus, sai urupi Ham ma hanami bani goluhnam, ase tongtong hanami marhatengeran ni uhur hu Bamu. Ai Ham do harohan ni haluahon bennami. Amen.*

HALELUYA NO. 260:1+3

1. Sai kawahkon partandaan na i babou in.  
Idahonmu hamonangan ni Tuhanta in.  
Naibata do hasomanta In ma dilo bei.  
Gotong hagoluhan in do jaloonta bei.
3. Tatap hayu pinarsilang ni Tuhanta in.  
Ai maningon Ham do monang.  
Mangajamkon in Naibata do hasomanta!  
In ma dilo bei;  
Gotong hagoluhan in do jaloonta bei.

SIPANGAJARI PAKON SIAMBILANKONON

“Ham Naibata, Ham do mangajari ahu humbani sietek-etekon nari, ronsi sonari sai huambilankon do halongangan na binahen-Mu.”

Psalmen 71:17

Anggo idingat hita atap irenungi hita situasinta humbani dakdanak nari i lobei ni orangtua dong ma ai na mangkorhon malas ni uhur ronsi pusok ni uhur. Malahan gati mansalakhon sonai manlawan orangtua. Nini parilmu jiwa haganupan ai boi do mempengaruhi goluhta das hubani panorang sonari. Atap na sonaha pe ai boi do ibagas hadakdanakonta, tapi sonari ibagas kedewasaan maningon akuhononta do bahasa orang tua na dob mangajari, patorsahon, hataridahan ni pambahenan na madear na sain dokah na mangkorhon lambin hormat hita mar-orang tua.

Sonai do par-Psalmen on age hita panorang on i lobei-lobei ni Naibata. Halani keterbatasanta, kelemahanta ronsi dousanta gati do lang ididah hita pangajarion ronsi idop ni uhur-Ni na patut sihamalaskononta. Tapi halani na dob lang habilangan be hita manjalo Hata ni Naibata, atap saduha umurta sonai ma dokahni hita gabe pengikut ni na dob matoras hita i lobei ni Naibata age ibagas haporsayaon maningon akuhononta, “Tuhan do mangajari ahu humbani haetekonku nari”. Pengakuan na sonai ai do na lambin patotapkon haporsayaon ronsi pangarapan sai na hasomanan-Ni janah ajaran-Ni do hita torus hulobeian on.

Haporsayaon bani hajongjonganta na sonai aima mambere gogoh hubanta selaku anak ni Naibata laho mangambilankon pambahenan-Ni marhitei goluhta ase lambin tambah na mangakuhon panogu-noguon ni Tuhan in.

Bani haganupan ai Tuhan Jesus do guru banta, lang dong na legan. Ipabotohkon do hubanta sonaha la mandompakkon bagei situasi na ihadapi panorang goluhni i dunia on janah haganupan ai ihamonangkon ronsi das hubani hayu parsilang. Mararti do ai age sonaha pe bentukni na idompakkon hita bani goluh on, malas ni uhur atap pusok ni uhur domma ipabotohkon hubanta sonaha patut hita ase boi mangkamonangkon ai mangkorhon haluahon banta. Halani ai totap ma hita ase boi marhitei hata-Ni na mambere gogoh hubanta laho mangambilankon pambahenan-Ni gabe malasni uhur janah haluahon, halani lang tadingkonon-Ni hita.

**Tonggo:** *Ham Tuhan Naibata, ajari Ham ma hanami mangkaporsayai pambahenan-Mu hubannami na dob salpu in ronsi hulobeian on. Janah pargogohi Ham ma hanami mangambilankon Hata-Mu gabe malas ni uhur ronsi haluahonnami. Amen.*

**HALELUYA NO. 381:1-2**

1. Ringgas au pararatkon,  
Hatani Tuhan in,  
ronsi hasangapon-Ni,  
'ge holong uhur-Niin  
Ambilan si harganan, Hata ni Tuhan in  
pasonang paruhuran  
ampakon Tonduy in.  
Tongtong do marmulia  
Barita ni Tuhanta,  
Sai lambin tarambilan  
goranni Tuhan in.

2. Ringgas ma au mangkatahon  
Hata ni Tuhan in,  
buei do halongangan  
Humbani na hinan  
Dihut ma au marulih bani hasonangan  
in, janah huhaporluhon  
mangambilankon in  
Tongtong do marmulia  
baritani Tuhanta  
sai lambin tarambilan  
goranni Tuhan in.

## PARMAHAN NA MADEAR 28 JANUARI

### NA MANOGU-NOGU IBAGAS HAMONANGAN

“Tapi tarima kasih ma bani Naibata na tongtong manogu-nogu hanami ibagas hamonanganni marhitei Kristus, anjaha ipatalar do misbou ni habotohan pasal-Si marhitei hanami bani haganup ianan.”

2 Korint 2:14

Iahap hita bani goluhta siganup ari anggo masa hasunsahan, gabe galek do hita. Na manggoluh hasintongan, mardamei, marholong na mamintah, marhasadaon, lang totap ai marianan banta. Gari i rumah tangga pe masa pe tong ahap na hurang sada, sonai age i tongah tongah ni na sahuta. Das bani na margoran na sakuria pe tarjadi do ahap na hurang marhasadaon, hurang mardamei, age itongah-tongah ni parhorja.

Ibagas on ma, porlu tumang banta sipanogu-nogu. Sipanogu-nogu na tongtong manogu-nogu hita arian pakon borngin. Pitah Tuhanta do ai. Ia do na totap anjaha na tongtong manogu-nogu hita. Anjaha lang pitah itogu-togu, tapi das bani na manramotkon ampa na marhamonangan.

Ai do na hinahatahon ni Apostel Paulus bani Kuria Korintus, ayat na tartulis i atas in. Tarima kasih ma bani Naibata na tongtong manogu-nogu hanami ibagas hamonangan.

Naha do nani hasaksianta bani panorang on? Naibata do na manogu-nogu hita? Ra do hita itogu-togu Tuhanta?

Halak na totap ra itogu-togu Naibata, ai do na totap roh hu parmingguan, hu partonggoan ampa partumpuan na manangihon Hata ni Naibata. Anggo sonai ma tongon goluhta, boi ma hita songon Apostel Paulus na totap patalarhon misbou ni habotohan pasal Naibata bani ganup ianan.

Ra do ham bani ganup goluhmu itogu-togu Tuhan Naibata? Anggo ra do, sai saud dihut do hita patalar hamisbouan ni Tuhanta Jesus.

**Tonggo:** *Ham Tuhan Jesus Kristus, togu-togu Ham ma hanami. Na ra do hanami itogu-togu Ham, andohar dihut hanami patalar hajengeson-Mu na misbou in. Andohar ibotoh halak na legan ma, marhiteihon hanami hamisbouan ni pambahenan-Mu bani jolma. Amen.*

### HALELUYA NO. 137:2+4

2. Parmahanni Jesuskin,  
Biri-biri-Ni au.  
Itogu-togu tonduyhin  
seng be marmara au.

4. Buei i tanoh on  
na manggompangi au.  
Sai Tuhan Jesus do tongtong  
Na manramotkon au.

MARPARLAHOU IBAGAS TUHAN JESUS

“Ai pe, songon panjalo nasiam bani Kristus Jesus, Tuhan in, sonai ma marparlahou nasiam ibagas Ia, marurat anjaha ipauli-uli ibagas Ia, jonam marhaporsayaon, songon na dob niajarhon bani nasiam, anjaha lambin martarimakasih.”

Kolosse 2:6-7

Kristen na i kuria Kolosse marasal humbani halak Jahudi pakon halak Gorik atap bangsa parbegu. Hansi pe sidea gabe Kristen, totap ope goluhni marurat bani hasaparion. Halak Kristen na marasal humbani halak Jahudi, totap do mangkatahon janah mangkaporsayai, marhitei na mangkorjahon Titah pakon aturan aturan do ase boi maluah. Anggo sonai aha ma bedani sidea sanggah agama Jahudi pakon dob konsi agama Kristen? Ija do peranni Kristus?

Janah halak Kristen na marasal humbani gorik pe totap do mangindahi hasintongan. Jesus pakon hata-Ni lang ijalo bulat gabe sada hasintongan. Totap do sidea marpingkir janah porsaya bani filsafat na totap sangsi bani hasintongan janah tongtong mangindahi kebenaran. Hape hatani Jesus do atap Jesus ai sandiri do kebenaran na lang porlu isangsihon age otik pe. Ibagas hata na pondok, domma Kristen sidea, tapi lalab ope marurat janah manggoluh bani hasaparion.

Dong bei latar kehidupanta. Na gabe sungkun-sungkun sonari: ija do marurat haporsayaonmu, bani hasaparion do atap domma ibagas Jesus? On ma sada dalam laho mangoreksi dirinta bei marsada-sada i lobei ni Tuhan in, Kristen na sonaha do ham?

Ambilan on mangojur hita halak Kristen na dob manjalo Jesus ase:

- Marparlahou ma hita ibagas Ia
- Marurat anjaha ipauli-uli ibagas Ia
- Jonam marhaporsayaon hu Bani
- Janah lambin martarimakasih hu Bani

Ra itanda hita do untei Japastrum, ai ma untei na migar daini. Somal do untei on iokulasi, artini itempelhon matani untei manis bani. Dob mulai longkot janah taridah ma tunasni untei manis ai, ipotong ma untei Japastrum ai pas i atas matani untei manis na dob ilongkotkon ai. Dob ni marbanggal ma tunasni untei manis ai, maningon totap do ipaborsih atap ipudekkon anggo dong tunasni untei Japastrum ai. Maningon totap irawat tunas ni untei manis ai, gabe marbanggal ma ia janah dob ni dear marbuah janah buahni pe lang migar tapi manis ma, janah goranni pe lang untei Japastrum tapi gabe untei manis ma. Sonai ma hita mamparlahou, marurat, ipauli-uli ibagas Jesus, janah jolma marhaporsayaon hu Bani anjaha lambin martarima kasih hu Bani; sambil manjaga ase ulang muncul tunas ni hasaparion.

**Tonggo:** *Tuhannami Jesus Kristus pargogohi Ham ma hanami ase boi hanami marparlahou, marurat janah ipauli uli ibagas Ham janah totap haporsayaon nami hu Bamu anjaha sai lambin martarimakasih. Amen.*

HALELUYA NO. 5:3+6

3. Huahap ma ningon mar-Tuhan,  
ningon manggoluh au Bamu;  
Seng jumpah au be hagoluhan,  
anggo seng pinasirsir-Mu;  
Sai Ham ma baen parsarananku,  
sai gok Bamu mando langkahku.
6. O Jesus goran-Mu uhirhon,  
bagas torang bai uhirhon;  
Ase tarsurut ilobeihu  
holong ni atei-Mu tongtong;  
hatanku ampa parlahouhu,  
ningon i puji do goran-Mu.

HAROHAN NI HAGANUP

**“Ai hun Bani, marhiteihon-Si anjaha hu Bani do haganupan in. Bani ma hasangapon sadokah ni dokahni. Amen!”**

**Rom 11:36**

Bani ayat i lobei ni hataon tarsurat, “Ise do na parlobei mambere bani Naibata ase la mambalas use bani?” Hata on sihol mangondolhon bahasa lang dong na parlobei mambere hubani Naibata, ase Naibata mambalas use hubani halak na dob mambere ai. Lang adong pambahenanni atap ise pe na manlobei pambahenanni Naibata. Pambahenan ni Naibata lang gabe balasan atap imbalan ni pambahenan ni jolma. Lang dong mungkahni atap pe na roh ni humbani jolma.

Tapi songon na hinahatahonni hata on, humbani Naibata do haganup na dong on, marhitei horjani Naibata do ase itompa haganup on. Naibata do na manompa haganupan on, Naibata do harohan (Sumber) ni haganup na dong on. I lobei-lobei ni Naibata, hita aima si panjalo. Aha na binahenta hubani Naibata pakon hasoman jolma aima na jinalonta humbani Naibata. Sadiha pe buei ni galanganta ganup Minggu, sadiha pe sumbanganta pajongjongkon gedong Gereja, sadiha pe buei ni lelangta bani pesta-pesta, na jinalonta humbani Naibata do haganupan ai.

Sadiha pe bueini pangurupionta hubani hasoman, na ni jinalonta humbani Naibata do haganupan ai. Ibahen na dob ibere Naibata do banta, ase dong sibereonta hubani Naibata pakon hasoman jolma. Na binahen ni Naibata pakon hasoman jolma. Halani bani Naibata ma hasangapon sadokah ni dokahni. Janah pitah bani Naibata ma hasangapon sadokah ni dokahni marhitei goluh pakon pambahenanta ari-ari.

**Tonggo:** *Tuhan, tarima kasih bani idop pakon holongni atei-Mu, na dob mambere hubannami haganup na dong bennami sonari. Pargogohi Ham ma hanami mamakei aha na adong bannami ibagas biar pakon tanggung jawab pitah hu Bamu tumang. Ibagas goranni Tuhan Jesus hanami martonggo. Amen.*

**HALELUYA NO. 6:2-3**

2. Hubotoh Ham do bona ni  
na dear haganup.  
Ibere Ham buei hunjin  
Bannami haganup.
3. Ai aha ma na dong hinan  
bannai na sombuh on;  
Ganup ibere Ham hinan.  
O Naibata tongon.

## PARMAHAN NA MADEAR 31 JANUARI

### JOLOM MA POLTIK ULIHTA IN!

**“Ai domma parrupehi hita bani Kristus, anggo poltik ijolom hita tenger ni uhur, na dob adong banta bani mulani ronsi ujungni.”**

**Heber 3:14**

Bagei do dalan mambahen hita gabe halak siirikkon Tuhanta Jesus Kristus, atap na ginoran halak Kristen. Tapi atap sonaha pe dalanni, boi nani ibalosi hita sungkun-sungkunni hasoman: Aha do ulihmu bani na mangirikkon Tuhan Jesus? Ra ma buei balosta pasal ai. Tapi anggo na porsaya in sada do balosni. Aima: Domma parrupehi ahu bani haluahon ampa hagoluhan na sadokah ni dokahni! Ai ma marhitei parmateri ampa parpuhoon ni Tuhan Jesus. Domma pala matei Tuhanta in manobus hita, ase ulang matei hita ibagas dousa ampa hajahatonta. Na puho do Ia ase papuhoon-Ni do hita magira laho manjalo hagogokni haluahon ampa hagoluhanta.

Jadi haluahon ampa hagoluhan sisadokah ni dokahni ai domma ibanta sonari. Ai ijin ra hita manjalo ampa mangkaporsayai Tuhan Jesus Kristus ijin ma ijalo hita ulihta. Jadi seng be sipindah pindahan ulihta. Seng be sipaimaon. Tapi siramotokonon mando ai. Panorang goluh sonari aima panorang manjolom poltik, mangkargahon ampa manramotkon haporsayaonta marhitei na tongtong martenger ni uhur bani ganup hata ni Naibata. Lang sangsi. Lang adong na legan na gabe hatengeran ni uhur. Age pangkat, kedudukan, jabatan, sinadongan, arta, habayakon, nai age niombah. Seng sihatengerhononta ai. Ai parsatongkinan do haganupan ai.

Tandani na poltik panjalomta bani haporsayaonta, taridah do ai humbani, pargoluhanta ari-ari. Tongtong mamparuhon aha do harusuh ni Tuhan in (Epesus 5:10).

Lang maragu haporsayaonni. Lang ganggang darngos panjolomni ampa padalankonni bani hata ni Naibata. Tapi totap anjaha tongtong marsijoloman botul bani pangarapan in ronsi ujung ni goluhni (Heber 6:11). Satia ronsi matei. Pambalosi ronsi ujungni! Ai pe halani adong ope panorang banta, jolom hita ma poltik ulihta in!

**Tonggo:** *Ham Tuhan Naibata na dob mamberekon benanami ulih siharganan in. Urupi Ham hanami marhitei Tonduy-Mu Tonduy Napansing in laho totap martenger ni uhur hu Bamu ronsi ujung ni goluh nami. Amen.*

### HALELUYA NO. 142:2+4

2. Tama longang uhurta bei  
mambogei pangontang-Ni.  
Antong, sai ulang engkar be,  
tangihon pandilo-Ni!  
Ai Naibata mandilo ham,  
halani ai sai roh ma ham.  
Sai roh, sai roh,  
hu surga ma ham roh.

4. Haporsayai ma hata in  
Ai in do haluahon  
Arapkon Tuhan Jesus in  
Daroh-Ni in ma jolom  
Age gok dousa uhurmin  
Maluah do bahenon-Nin  
tongon, tongon  
maluah baenon-Nin.